

ASO LULU, 24 IUNI 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: E faasilasila atu ua toe amataina nei Taualumaga a le Fono Aoao Faitulafono.

E talitonu le faamoemoe i lenei taeao fou e le mafai i upu ma tala ma le gagana ona tatou faafetauia le alofa ma le agalelei o le Atua ua mafai ona toe feiloai i taimalama i lenei aso fou i Lona alofa faaaauau ma Lona alofa silisili ese, ua mafai ai ona tatou toe aofaga potopoto i lenei taeao, le paia ma le mamalu o le Palemene aemaise o le Fonousu a Samoa. Ou te ofo alofa atu ma ou faatalofa atu i le tulaga aloaia. O taimi uma lava tatou te nofo manatunatu ma tatou vaavaai pea i le alofa o le Atua ia Samoa ma lona Malo. E talitonu foi le faamoemoe, e le mafaitaulia mea uma, e le gata i totonu o lenei Palemene ma a outou Afioga i Taitai o le Malo, ae faapena foi le tapuaiga a Samoa i ona vaega eseese. E faatalofa atu foi i le paia ma le mammalu o le Palemia ma le Kabeneta i lenei taeao.

Ia alo maia o le a faasolo le tatou galuega ma le talitonuga, e papaaveloa ma le agaga ma le faamoemoe ina ia tini tauao mea uma ia faataunu ma pasiaina le Tala o le Tupe ona faapena foi lea ona faaaauau Taualumaga. O lo o faatalitali foi Ofisa Sili o Pulega ma Pule Sili ua tatou faatasi foi i lenei taeao aua le faaaauauina o le latou fatuaiga tausi o le tautuina o le tatou Malo. Faamalo atu, malo le onosai mai, faafetai foi le taotaotua ma le tautua Malo i lo outou alaala mai pea i taimi o Fonotaga aua se mataupu e manaomia ai le fesoasoani. Samoa i lenei taeao, ia au le Atua i le faatautaiga o le tatou atunu.

E faia le tatou malologa i le po anapo ua avatu le avanoa i le Afioga i le Minisita mo Galuega, Felauaiga ma Atinae Eseese. Tulai maia le Minisita mo Galuega, Felauaiga ma Atinae Eseese o lea ua oo i le taimi o lau Matagaluega.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2014/2015 & TULAFONO TAU FAAOFI O LE
FAATATAUINA O TUPE 2015/2016 – felafolafoaiga i luga o le faitauga
faalua – Aso 4**

Afioga Hon MANUALESAGALALA MATI TUIGAMALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai, ua ou manatu i lenei taeao ma le aso, o lea la ua gafoa ata a ua totogo foi malama aua ua malutauue le Maota nei.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O le viiga ma le faafetai i le Atua, a lea ua sunui le la i lagatapu pei o le fetalaiga ia Sa-Tagaloaalagi, aua o le Atua e faavae ai Samoa, e faatonutonu folau ma taumualasi i le tatou faigamalaga. Ia tumau i le Atua le viiga e faavavau, ae lepa ia faalatiu i le vasa le paia o le Maota Fono Faitulafono o Samoa, a o le tapuaiga foi i le Tafatolu o Faigamalo, Ekalesia o lo o nonomanu i le Atua aua Samoa, aemaise o Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Le paia mai le Matasaua i le galu na siisii i le atugaluga o le Tuimanua seja paia le galu na pisi i Siupapa e tulata i Falemoa na tauilo ai manu o Malo. E i ai le muagagana, e i ai mafaufauga fai mai, öYesterday is history, tomorrow is mystery, today is a gift.ö O ananafi o le talafaasolopito, o mea sa tutupu, e aoao mai, e faufau ai ma faatonutonu ai taeao aua foi o taeao o le lumanaí o le mea lilo, e leai lava se maemae na te silafia le mea e tupu ai, vagana le Atua ua pule aoao. A o le aso, o lea ua tatou faafetai ma vivii ma tatou faaaogaina ma le tatau o mea ua maua i o tatou lima, ua ogatasi mafaufauga ia ma le Tala Autu o le Tupe o lo o faatino nei.

Lau Afioga i le Fofoga Fatalai, ou te manatu o le a ou oo loa i nisi o mataupu sa laga aemaise o galuega faatino a Matagaluega ma Faalapotopotoga. O le Pulega o Felauaiga i le Laueleele, o lea sa tatala i le vaiaso talu ai, o galuega o lo o soosootauau ai le Malo, o le Faletupe o le Lalolagi ma le fesoasoani mai le Malo o Ausetalia e pei o le galuega sa tatala i Samusu agai i Lalomanu ma se tasi o galuega sa faatinoina. O lo o faagaoioi foi auala i totonusi o Lalomanu agai i Lepa, o auala ia e mafai ona savavali ai pe a oo i taimi o faalavelave e tutupu ai, o lea o lo o faagaso, pe tolu auala o lo o mafai ona faatino i Lalomanu i le vaega lea. O lea ua tatau ona amata le tatou galuega o le Vaitele Street, e agai atu i Vailoa e tau i Saina. Ou te iloa po o le masina fou, o lea ua amata ona tapena le kamupani o lea e nafa ma le galuega lea aua ua uma mea uma, ua uma ona ave i ai, e faapena foi ona aumai le lagolago a le Faletupe o le Lalolagi, lona uiga po o le vaiaso fou ua amata ona faatino le tatou galuega lea.

O le galuega i Leone i le auala laupapa, o le la ua faamaea le tusiga o ata, design ona faasalalau lea i se konekarate latou te faatinoina le galuega lenei. O le galuega lea i le western road po o le alu lea i le malae vaalele ma Mulifanua, o lea ua maea le latou ata, o le la ua fai le survey, galuega faafuafanua, o le la foi ua tapena le design ua tatau foi ona tuuina mai aua foi polokalame masani e tuuina atu i le Faletupe o le Lalolagi mo le latou iloiloga, ma agai e faasalalau aua se konekarate e faatinoina lea galuega.

O le tatou galuega i le Maliolio, le auala laupapa o Maliolio, o la e foi ua amata ona tusi ata ua uma ona tauofo le galuega lea i se kamupani latou te vaavaai i ai i le tusiga o ata, ina ia vave ona faatino le tatou galuega lea. E lua vaega o lea o lo o taumafai i ai, o le mea o lo o taatia ai le auala tuai ma le vaega e vavalalata ai ituvai e lua, pe faigofie lena. Na pau le mea, e i ai fanua o lona uiga o le auala fou lena o le a faataatia i ina.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O vaega uma ia e lua o lo o taumafai i ai le suesuega lea ina ia manino mai ma mautu, o le a le tau, e fia ni fanua e aafia mo le fausiaina o le auala laupapa o lo o faamoemoe i ai.

O tatou auala galue, o lo o faasolo pea le tatou polokalame i tatou auala galue, o auala galue sa tatala ma auala galue o lo o faamoemoe mo le aso a taeao. Sa ou taumafai foi e failoa atu, e tele lava galuega o lo o fuafua i tatou taligamalo ma mala faanatura e tulai mai a o lo o taumafai lava le tatou Pulega ina ia faaofi i ai ma le galuega mo tatou auala galue. O isi faafitauli la e tulai maií ..

FOFOGA FETALAI: Malie lava lau Afioga i le Minisita mo Galuega, se i tuu atu le avanoa i le faauilavea a le sui usufono. Tulai mai le sui usufono mo Faasaleleaga Nu.4.

Afioga Peseta Vaifou Tevaga (Faasaleleaga Nu.2): Lau Afioga i le Fofoga Fetalai, e momoli atu le faafetai i le saunoaga a le Afioga i le Minisita. E leai, e le o faalavelave lava i se vaega o le saunoaga matagofie, ae ua ou tulai atu ona o le fia faaopoopo atu i le tulaga lea, e fia faamalamalama atu le tulaga lea sa tulai muamua mai i le faagasologa atu o le auala laupapa lea o le Maliolio ina ia manino i ai lau Afioga ma le Matagaluega ina ia faafraigofie. Ona o le taimi na oo atu ai nisi foi o le Matagaluega, e pei ua agai atu i le tele o afioaga. E pei o le mea lea na mafua ai ona tau lagalaga le tulaga lea, ae tatalo atu i lau Afioga, aua o le tele lava o le fanua lea, o le fanua o au lea e talanoa atu, o lea lava e faataatia atu aua fuafuaga a le tatou Malo. Ae pei o le tulaga na tau lapelapea ai le mea lea, ona o le a pei e agai lautele le tele o matai e le aia i latou i le ogaeleele tonu lea. Ma le faaaloalo lava.

FOFOGA FETALAI: Tulai mai lau Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Faafetai lava mo le faauilavea. Ou te manatu o le a manino le vaega lea pe a oo ina tapena mai fuafuaga o lo o agai i ai aua e lua taatiaga o auala lea e tau tilotilo agai i ai, ona fua lea i vaega o le a tele ni fanua e aafia ai, ma le vaega foi e tau taugofie le mea e faatino ai le galuega. Ae ou te manatu, o le stage muamua lea ua agai i ai, ae o le a felogonai lava ma le Afioga foi i le Minisita Lagolago ma le afioaga mo ia vaega uma.

A o tatou auala ia, mo le silafia e le Maota nei, o le tele o isi auala ia e faatino e le Pulega, o auala agai i faletalimalo, o auala ia e fesoasoani i ai ona o le tasi lea o atinae e fesoasoani tele i le tatou tamaoaiga ma maua ai galuega a tagata. O le polokalame foi la lea e i ai, o lea e taumafai, e tele talosaga na tuuina mai. Ou te manatua e i ai le talosaga na tuuina mai e le isi faletalimalo e i ai le auala e fesootai ai ae mananao i se auala fou e tau i ai, ae ova ma le kilomita.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Ona o lea, o le Pulega e asiasi i ai ma fai mai le latou cost estimate toeitiiti \$2milliona e faaalu ai i lea auala. E le na o auala galuega...o mea na o lo o tanumia i lalo, ae mo le silafia e le Maota, o le tasi lena o vaega o lo o faasoa i ai paketi a le Malo e faatino ai galuega o le agai i Faletimalo. O isi vaega e i ai nofoaga e estates ua leva ona vaevae ona faatau lea i tagata e pei ona i ai nofoaga i Siusega, o ni fale lelei o loo i ai ae i ai lava faiga faavae a le tagata o le ownership po o le sub divide o ia e faia auala nei ona mafai lea ona toe faatau atu i tagata ua i ai uma le service e totogi. Ae peitai e le o le auala lea o lo o faatino ai, a ua o nonofo ai ma faatau ona omai lea i le Malo e agai atu sei fai le auala ae ova ma le 30 aiga i se auala o lo o nonofo ma aumau ai, a o fale lelei lava. Na ona o atu lava o masini i aso ua leva sua auala, e pei o Siusega e tele auala faapena o lo o talosaga mai a o lo o i ai lava faiga e masani ai e tatau ona alu le tagata e vaevae, aemaise o aiga e ona nei estates, e o lava latou e fai auala ma vaevae ona faatau ai lea. O le tasi lena o vaega ae ana faapea e tuu faatasi ai ma tau o mea ia, o lona uiga e maualuga lava le tau o nei fanua, a ua o tagata e nonofo ai ona omai lea i le Malo a ua ova ma le tai 20-30 tausaga talu ona nonofo ai. O le tasi lea o galuega o lo o agai i ai le Pulega e tilotilo ma fai ai le faasoa ae le o se mea e tatau ona faia e le Pulega ma le Malo nei galuega. A ua ave i ai ona o le Anavatau lea a le Vaega Faaupufai lenei o le aiatatau. O lena ua taumafai ai e faatalaloa le auauanaga ma faaoo atu i ai le fesoasoani i nei fanua. O nei fanua ua leva ona nofia ai tagata ma vaevaega ua leva onaa o lo o tau faatino lava i ai. O le isi vaega o nei auala e galulue faatasi ai ma le EPC ona e i ai ni projects o faia i ina, ona taumafai lea e toso atu sei taumafai ai le Pulega o Galuega, Felauaiga ma Atinae Eseese ina ia faia nei galuega. O le agaga maualuga ia fesoasoani i le atinae o le eletise ina ia mafai ona pau i lalo le tau, o galuega ia o lo o faatino ai i, ina nei tei ua outou finagalo na o auala galue e agai ai la tatou paketi. O le tasi lenei o galuega o lo o faasoa i ai ona le auau lea o le faasoa ma 1 faasopolia ai talosoaga sa tuuina mai.

O le auala o Manono, o le polokalame o le motu o Manono atonu o se tasi lenei o auala ua leva ona faatonuina e le Afioaga i le Palemia, ua uma ona o le aufaigaluega ma fai le latou suesuega ma le latou galuega i Manono tai e faatino ai le auala taamilo. E tolu vaega sa tuuina mai, o le auala ta e aumai lona tau, o le auala faa-sima ma aumai lona tau, ma le auala na ona teu ma tuuina mai le tau. O le fesootaiga o Manono uta ma le motu i tai, e manaomia ni masini talafeagai e faatinoina galuega i tai, peitai ane, e le o talafeagai ma le uafu i le taimi nei. O lea foi sa faatonuina e le Afioaga i le Palemia le vaega o le Pulega o Uafu ina ia vaavaai i le tulaga lea o le faaleleia o le uafu mo lea polokalame. O lona uiga, o le package atoa le mea lea e vaavaai ai i le motu atoa lenei o Manono, e le gata ia lelei le uafu e mafai ona fesootai ai ma masini nei e faaleleia le auala.

E pei foi o le vaega o le Pulega o le Suavai ma le talosaga e pei ona tuuina mai, e le o nofoai le Malo e tusa ai ma le faamoemoe e pei ona saunoa le sui usufonoí ..

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: Tulai mai le faauilavea a le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga mo le avanoa, faamalulu atu foi i le Afioga i le Minisita, o le ava lea i gatai o Salua e ofi mai ai i Satuilagi le Fotu ona lafo mai lea o lona Ramp aua o loo i ai le papa mafulafola i ina e tau mai ai ma ave ai masini i uta. Ma lou faaaloalo lava.

FOFOGA FETALAI: E malamalamā lelei le sui usufono leaga o le Manono.

Afioga Hon MANUALESAGALALA MATI TUIAGAMALA ENOKATI POSALA: Ia ai na fai muamua se sailiiliga a le Minisita Lagolago mo lea vaega, ae ttau fautuaga nei e moomia ona o le toe tele ai lea o nisi suesuega e faia. E talosaga atu ai afai o i ai ni finagalo ma ni mafaufauga faapea, faamolemole faasoa mai e aoga e atiae ai fuafuaga mo le atunuu.

O le auala i Alamagoto, o le auala lea ua leva foi ona faatonuina ina ia faia lea galuega. Ona pau le faigata ona e irregular road width e alu atu i le isi auala e 15mita, alu atu i le isi auala e 15mita, alu atu i le isi vaega 10mita, alu atu i le isi vaega e 8mita, ona o fanua o aiga o lo o i ai, e le i vaevaeina o la e subject i le road wide. E le i vaevaeina o latou fanua ona e i ai fanua tau Samoa o la foi e front ai i le auala lea. O nai faafitauli na o lo o taumafai i ai aua e tatau ona fai lelei se ata e design lelei aua e le mafai ona sau piopio solo se alavai ona o le tulaga e tatau ai, ia laugatasia le 10mita o le lautele pe 15 ona mafai lea ona galue ai i totonu, a o lo o taumafai le Pulega i se auala e foia ai lea faafitauli ma faatino ai lea galuega. E sao lelei, leaga e tele le faafitauli ma lamatia ai le soifua pe a malaga i lea auala. Ua pau ia te au le isi auala o le cross island road i le alu atu i Tanumaganono e pei ona saunoa mai ai, seia paia Vailima.

Susuga Hon Tuilaepa Fatialofa Auelua Luplesoliai Aiono Neioti Sailele Malielegaoi: Lau Afioga i le Fofoga Fetalai, o le auala tonu a lea i Alamagoto ua tele feiloaiga e faatalanoa ai ona o le isi vaega tele e aafia ai pe a lea auala o le itu lea o le mauaga o Vaea, a oo i timuga o le itu atu lea o le mauga o le matua tetele o timuga ma le tele o le vai e sau mai luga o le mauga ona sau loa lea i le tulaga lea e i ai alavai, ou te le iloa po o ai na faia ia ituaiga alavai. A timu mai ona sau lea agai i tai i alavai ae le o mamao le vai tele i gauta atu sa tatau ona tafe i ai. Ou te matau pea i le alavai lea, e tetele mai loa, e sau uma lava i tai ona sau foi lea feomiai ai ma isi alavai nei e tafe mai Fugalei ma tele ai le vai e vailaloa uma ai lena ogaeleele ma soona lolovaia ai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Ua le tasi, le lua a matou talanoaga, masalo na o le pau lava le mea e fai i eleele nei ona o eleele umia saoloto, o le take loa e le Malo mea ia, leaga ua tele tele fanau a le atunuu lea e nonofo ai ae sao le Minisita e tele vaega e matua vaiti ai le auala. O le tulaga lena ou te iloa e le maalofia, e le taugofie foi le mea e fai ai i le vaega lea aemaise o le itu e aafia ai fanua umia saoloto.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon MANUALESAGALALA MATI TUIGAMALA ENOKATI POSALA: O le auala lea i le alu atu i Tanugamanono e agai i Vailima, o le tasi lea o auala o lo o fesoasoani mai ai le Faletupe o le Lalolagi ma sa laga foi e le sui usufono i le aso ananafi. O le tulaga ua i ai, ua amata ona tusia le ata ae i ai foi faafitauli e faapea ua i ai foi nai vaega e le o ausia le lautele talafeagai i nisi vaega o le auala, ae o lo o taumafai lava i se auala e mafai ona foia ai lea faafitauli.

O le tulaga i le auala i Vaimoso uta po o Alafua uta, sa alu foi la matou asiasiga, ua saunoa foi le Palemia, o le auala lea e sau mai Moamoa e va i le vai ma le auala e agai ai i uta o lo o fuafua e fai ai se auala laupapa ina ia mafai ona faaaoga lena i le alu agai i Moamoa. Ou te iloa e fesoasoani tele i le traffic congestion_lea e masani ona i ai i lena itu. O le vaavaai lena i ai ma tau fuafua, o lona uiga, e faatino faatasi lena auala ma se auala laupapa e mafai ona fesootai ai, o se faiga lautele lena ma le agai i luma e faamalieina ai le sui usufono.

Sa laga foi le tulaga o Vaisigano, o lo o ua i ai le task team lea ua faatinoina lea vaega ona o le silasila a le Malo ma le Afioga i le Palemia, Afioga i le Minisita mo Punaoa Faanatura ma le Siosiomaga ma i matou, ina ia unuai lea tulaga ma vave faatino. Ua maea foi ona faasalalau i tua fuafuaga faapena atonu o le a manino atu i se taimi mulimuli, a o le tulaga lena, o lo o i ai le Komiti Faapitoa e vaavaai iai i lea galuega ina ia vave faatino ma faaleleia.

O le tulaga lena ia tatou auala ma le talosaga ua tuuina mai mo auala galueí e oo foi ia ta ita, a talosaga mai se isi ae le mafai ona faatino, e lagona ai foi le faanoanoa ona e le o mafai ona ausia lea vaega. A lua auala galue e sili atu ma le miliona, afaí e 4 miliona lea sa saunoa i ai se tasi o sui usufono, e le mafai ona ausia, o isi nuu e 5 auala galue i le nuu e tasi, afaí o le sui usufono e 5 ona nuu po o le 9, o le lautele foi lena o le tilotilo i talosaga. O le mea lena sa taumafai atu ai e i ai nuu e le i oo lava le ta i o latou auala galue, o nisi nuu ua toe oo mai talosaga, a o lo o taumafai i se faasoa faapena, e pei ona faafogoga ua 53 tausaga a o lea faatoa fai, a o le mea sili lena ma taua o le tau fuafua atu ae afaí e ausia i lenei tausaga ona pe uma a i lenei tausaga le Paeaiga, ae faagaoioi ma faatino lava galuega a le tatou Malo. E faamalulu atu ai i le faasoa le auau a le Pulega ma le Matagaluega o Galuega, Felauaiga ma Atinae Eseese ina nei le faamalieina le maualuga o le tatou Maota nei.

O le Pulega o Uifu ma Taulagaí .

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: Malie lava lau Afioga i le Minisita, tulai mai le faauilavea a le sui usufono mo Gagaemauga Nu. 2.

Tofa Levaopolo Talatonu (Gagaemauga Nu. 2): Lau Afioga i le Fofoga Fetalai, e puupuu lava le vaega lea sa ou taua i lau lauga e faamalulu atu ai i lau Afioga i le Minisita, ona o le matou nuu o Salamumu e leai se auala galue ona e leai foi se talaloa a lenei nuu e fai ai ni faatoaga. A o le tatalo ma le tagitagi atu ona o le auala a le Malo e agai i tai ona o i ina o le togafau atoa lava lena e faaaoga e matou e fai ai meataulima matou te feola ai, a o lea e le i i ai se saunoaga a lau Afioga ae ta te tuaoi, ae pe le tope ane loa ta ita i lenei faaiuga o le tausaga. Faafetai.

FOFOGA FETALAI: Malo. Tulai mai lau Afioga i le Minisita mo Galuega, Felauaiga ma Atinæ Eseese.

Afioga Hon MANUALESAGALALA MATI TUIGAMALA ENOKATI POSALA: Faafetai, o taeao lea e tatala ai le auala o Saleaula, ia o Salamumu Saleaula, se i fai muamua Saleaula i Savaii ia ona fai ai lea o Saleaula i Upolu.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo faamau ane pea le talosaga, ae pei lava na ou faalogo atu e leai se talaloa, o mea nei o auala galue e agai i le talaloa, afai la e leai se talaloa, ia o lona uiga, e leai la se mea e tatau ai ona fai se auala galue.

Tofa Levaopolo Talatonu: Lau Afioga i le Fofoga Fetalai, leai e sao lau tala lea na fai atu, e leai se matou taloloa ae leaga o lea na ou faauilavea ua oo i mea tau auala so o se ituiga auala lava. Pei o le tatalo lena lau Afioga i le Fofoga Fetalai.

FOFOGA FETALAI: Ia malie ia o le a tatala muamua Sale ona fai ai lea o Sala. Tulai mai lau Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, ou te oo atu i le Pulega o Uafu ma Taulaga o lo o faaaauauina pea latou galuega ma tiute masani, e tele le aoga o kamupani ia ua omai lea ua faatuina i luga o le uafu, lea e faatino ai lenei Transshipment, e tele vaa ua mafai ona oo mai, ia ma siitia ai foi le latou auaunaga ma maua nai a latou seleni. O lea foi ua saunoa le Minisita mo Faatoaga ma Faigafaiva, ua tele galuega la e i ai, a o lea e tau sue ni galuega e le fia o i ai lo tatou atunu, a o lea sa sainia i le Aso Gafua nei i le Maota nei ia le Feagaiga o le fausiaina o le tatou uafu i Matauu, ia o tulaga masani lava eí ..

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: Malie le Minisita, se i tuu atu le avanoa i le faauilavea a le Afioga i le sui usufono. Tulai mai le sui usufono mo Aana Alofi Nu. 3.

Afioga Toeolesulusulu Cedric Pose Salesa Schuster (Aana Alofi Nu. 3): Faafetai i lau Afioga i le Fofoga Fetalai mo le avanoa. Ou te le faalavelaveina foi le saunoaga matagofie a le Afioga i le Minisita, a o le talosaga ona o le vaega lea ua taua le konekarate lea ua latou faatinoina ma vaafagota o lo o omai.

O le talosaga, po o i ai i totonusi o lenei konekarate foi po o le MOU le aua ne i faaaluina le suavai po o palace water i totonusi o gataifale o Samoa ona e tele foi le aafiaga o figota aemaise o ia o lo o faapea ona faamoemoe i ai lo tatou atunu, a o le tele o vaafagota, a omai ma saati o latou palace water i totonusi o vai, ia e moni o le a maua se manuia i ia vaega ae i ai foi le aafiaga tele o le tatou siosiomaga, faafetai.

Afioga Hon Palusalue Faapo II: Lau Afioga i le Fofoga Fetalai mo le faasaoina o le taimi o le Minisita.

FOFOGA FETALAI: Tulai mai lau Afioga i le Taitai o le Itu Agai.

Afioga Hon Palusalue Faapo II: Leaga ua faasilasila soo au avanoa ia e le mafai ona faatumuina e le atunu. O lau fesili la i lau Afioga i le Minisita aemaise lau Afioga i le Minisita mo Faatoaga ma Faigafaiva, po o faasalalau nei avanoa, aua ou te le o vaai lava i le Televise, ou te le o vaai i nusipepa o faasalalau ai nei avanoa ae matua tele nei avanoa? O lau faafesili atu lea i lau Afioga leaga e taua, faafetai mo ia avanoa ua maua mai.

FOFOGA FETALAI: Malo. Ua maua le finagalo, ae o le a avatu pea le avanoa i le Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Ia so o se mea lava e fai e le Malo e faasalalau, faasalalau lava mea uma. O le tulaga lena o la e i ai ia procurement guidelines ma procedures, e faasalalau agai i tua ia silafia ma maua avanoa tutusa e tauofo mai ai ma faigaluega ai, e leai se mea o faaletonu.

O leí .

Afioga Hon Palusalue Faapo II: Lau Afioga, leaga o lea e saunoa mai le Minisita o la e faasalalau, a o lou talitonuga e le o faasalalau ni avanoa, e le o silafia e le atunu. E te talitonu, a faasalalau, e le ofi tai i o i tagata fia faigaluega.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: O lea ua tali le Malo lau Afioga i le Fofoga Fatalai, e leai se isi tali i tua atu o le na. Se i tulai mai la lau Afioga i le Minisita mo Faatoaga ma Faigafaiva.

Afioga Hon Le Mamea Lemalu Su'a Leatuavao Tuiletufuga Ropati Mualia: Lau Afioga i le Fofoga Fatalai ua faasalalau soo i pepa, a lea na ou fai atu, e o atu tagata e manao foi lele e na o sina lua vaiaso e alu ai i tai toe foi mai laia i le aiga. A foi na tali atu le Afioga i le Palemia e mai manatu foi lele pe a umi ona alu i tai, i le toalua, ia o le mai la lena o lea e maua ai tatou, o lea e tele galuega ua uma ona ou talanoa, aua leaga o le excess agreement lea na fai o lea foi na fesili mai le la, o lena e i ai uma lava i totonu o le excess agreement, o le excess agreement, ia aua nei lalo ifo o le 75% o galuega o tagata Samoa, ia o lea la e mulimuli lava le kamupani i le agreement na fai, ia ae a o atu, o tagata e manao i le mea foi lea na o lava feofeoai maua tupe toe o i le fale, a o la ua sue mai tagata mai Kiribati, Solomona ma Tuvalu, o la ua faigaluega i luga o vaa ia, ae ua uma ona faasalalau, ma lou faaaloalo.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fatalai, e aofia ai foi ma le vaega lea e saili galuega i Niu Sila, o le autau-apu ma le autau-aniani, e i ai foi le vaega ua toe foi mai ona o le mea lava lea, o lea ua ou mafaufau o le a faatuina se faalapotopotoga, se faalapotopotoga pei o lagū faalapotopotoga foi lea o le aufaa-fafine, o le ou faatuina se faalapotopotoga o e mai manatu, o tagata uma lava la e mai manatu, o le a faasa ona faafaigaluega i galuega ia ona faigofie ai lea ma le mao i ai o galuega ae o atu ona toe taliu mai lea, ia ma oo ai ina le maua e lo tatou atunu ia faamanuiaga ia, ae o le a ou faatuina se faalapotopotoga leaga o le mea lena o lea e tupu nei foi e afaina ai ma avanoa o tatou tagata e o ai i Niu Sila ma Ausetalia ona o tulaga lava ia i le gasegase lava lea o le fia o i le malaga ae avatu ai ma si teineitiiti faapea le matua, ma le isi, ma le isi, ia na fesili atu lea pe na mafua aisea, fai mai, ua matou foi mai i le Ofisa o Niu Sila, e le talia a o nai tamaiti nei e mai manatu. O le mea la ua ofo ai Niu Sila ma Ausetalia, e na o Samoa lava e maua ai le mea lea o le mai manatu, a o lea e iloa lelei lava, e ave loa tamaiti ia e overstayer uma i o, e ave uma e faa-overstayer. O le mea lena lau Afioga i le Fofoga Fatalai, masalo pau lea o le fofo, o le faatu o se faalapotopotoga o e mai manatu, ona faigofie ai lea ona iloa tagata e le tatau ona avea i ai ni galuega.

Tofa Lealailepule Rimoni Aiafi: Lau Afioga i le Fofoga Fatalai, ou te fesoasoani i le tatou mataupu. Ou te lagolagoina le finagalo o le Afioga i le Palemia i se faalapotopotoga faapea, ae e tatau ona sao le tagata e vaaia.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O lea la ou te fautuaina, avatu Levaopolo e vaaia, aua e nofo i o le toalua ae nofo ia i inei. O lona uiga, o le tagata tonu lava lea e fetaui e ao tagata, a nofo i inei le toalua, fai i ai Levao, e o i o latou taitoalua e faigaluega, ma le faaaloalo lava.

FOFOGA FETALAI: O le a maumau le tatou taimi i le tulaga lea, malilie ia sui usufono, o lea ua manino ma malamalamama leí .E tatou te faaataatalafoga i le mataupu lenei, ae le logomalie i le faafofoga a le atunu. Ua tatou toe asa foi le ogasami ua uma ona asa i le vaitau o le Esetete, e fai atu galuega e le galulue le atunu, o lea na ala ai ona ai filifili le mea lea o le aumai o tagata Saina, tagatauli ma isi ituaiga tagatanuu ia o le mea lava lea. O lea foi la ua toe tulai mai, e le faigofie la leaga o lea tatou te vavao, e le o i ai ni galuega mo le atunu. Ia se i silasila la i mata o maasiasi i le mea lea e tupu i le saunoaga a le Minisita mo Faatoaga, o lea ua aumai kamupani e latou te maua ai galuega ma le tamaoaiga, ia a o lea e le fia faigaluega? Ia Samoa e, le atunu, e le aoaia e Laupua Tamafaiga, leaga o le manulauti leaga o lea na aumai manuia ae valetuulima. E le o ni upu e avane ai mea nei, silasila i faleia ua aumai ma mea tetele e maua ai manuia, ia o lea la. O fea la o le a tatou toe agai i ai? A gasea le tulaga o le taumafaiga o galuega ma mea, ia e tatou te talie, ae le manuia. Le paia ma le mamalu o lea e faafofoga mai leaga e le na o tatou lea e fono, ia alofa le paia ma le mamalu o Matagaluega e fai, o lea ua saunoa le Afioga i le Palemia i tulaga e foia ai faafitauli nei, e le gata i lea silasila foi, ua oo lava i tauga-apu ua usu pese, ona o le faamoemoe o le mea lea e tupu, o le faafitauli, e tatau ona vaai totoa i ai Matagaluega a le Malo e fitoitonu, ona filitagaga lea i ai ina ia aua nei o tatou valetuulima le mea lea ua aumai, o lona uiga e le gata ai, ae tatau ona tatou mataitu. E fautua atu i le Maota mo le tulaga lea.

Tulai mai lau Afioga i le Minisita, malie se i toe tuu atu le avanoa i le Afioga i le sui usufono mo Faleata Sasae.

Tofa Aveau Tuala Lepale Niko Palamo (Faleata Sasae): Faafetai mo le avanoa. O le tulaga lea i avanoa faigaluega ia, e i ai ia mafuaaga e ala ai ona le fia faigaluega tagata i le galuega pei ona silafia, o le totogi le isi vaega, ae a tatou tagai i le Tala o le Tupe lea e tatou te talanoa ai, se i oo i le taimi e auiliili ai ona avatu ai lea o se manatu. E pau lava faamaumauga lea e sau i i, o avanoa faasalalau lea e sau i lalo o le Leipa le MCIL lea e faasalalau mai ai, e na o le 60 lava avanoa ia e sau i i na faasalalau i le Observer lea e i ai i totonu i i, e le o i ai ni faamaumauga i totonu o isi Matagaluega ia pei ona saunoa i ai le Afioga i le Minisita i avanoa faasalalau.

FOFOGA FETALAI: Ia o lea o le a tali atu le Minisita o ia e ana ia le faamaoniga. Tulai mai lau Afioga i le Minisita mo Faatoaga ma Faigafaiva.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon Le Mamea Lemalu Su'a Leatuavao Tuiletufuga Ropati Mualia: Lau Afioga i le Fofoga Fetalai, o kamupani ia e le o ni kamupani a le Malo, o private companies, tai pei lava la o faleoloa foi ia, e le faapea la o le a faasalalau e le Leipa avanoa a kamupani ia, e le tau aumai la i totonus o le Budget po o totonus o Matagaluega, o mea o kamupani foi ia, o lena e te silafia. E le mafai ona alu atu fua se aia a le MCIL ia i o i le kamupani fai ia. Ia o lena e te silafia lelei lava, a o a na ituaiga fesili faavalevalea faapena.

FOFOGA FETALAI: Ia tulai mai le sui usufono mo Faleata Sasae.

Tofa Aveau Tuala Lepale Niko Palamo: Lau Afioga i le Fofoga Fetalai, o fuafuaga a le Malo i veaga ia, o a uma lava ia galuega o lo o avanoa e tatau ona aumai i lalo o le lipoti, po o le kamupani po o le a, leaga o le faamoemoe o le atunu. O lea la ua saunoa foi le Afioga i leí ..i lalo foi o faamaumauga a le STATS e lavea uma ai vaega ia, e le o i ai ni vaega faapea o tele ni galuega faapea, leaga ne i te i ua ave sese e le atunu leaga o lea e faafogoa mai le atunu faapeái ..

FOFOGA FETALAI: O lea ua maua le finagalo o le sui usufono, ia se i tulai mai le Afioga i le Minisita mo Faalapotopotoga Tumaoti a le Malo.

Afioga Hon Lautafi Fio Selafi Purcell (Minisita mo Galuega tau Alamanuia ma Atinae a le Malo): Faafetai lau Afioga i le Fofoga Fetalai, leaga o lea ua tawa e le sui usufono mamalu le STATS leaga o le tasi lena o au Matagaluega, e le i oo i ni taimi e fai ai ni Statistics a le Matagaluega i i i le kamupani fou lea, pei o lea faatoa faatu, ae ou te tautino atu ou te lagolagoina le Afioga i le Minisita ona o au sa ou i ai i le aso na tatala ai. Na ou fesiliglia lea o le tamalii o le atunu o lo o agent ai i inei i Samoa, po ua omai nisi e faigaluega i le tatou faleia ma tatou vaafagota? O lana tali, e uma loa le interview muamua, e tau atu e oo i le tolu masina e folau ai, o le o atuga lava na e le toe foi atu, a o totogi ,o le faamatalaga a le Afioga a Fanene, e lelei tele totogi, ae o le mea lava lea, e uma loa le interview, o le o atuga lava lena e le toe omai. O le faamalamalamaga lea lau Afioga e fesoasoani ai.

FOFOGA FETALAI: Malo. Ua manino ma malamalamama lea mataupu ona o atugaluga ia ua lafo atu foi le vaivaiga o le Fofoga Fetalai e tautuana lo tatou Maota e timai le atunu, ia onosai o lea ua maua galuega, ae aua le aifilifili, vaeane le tatou Fono.

Tulai mai lau Afioga i le Minisita mo Galuega, Felauaiga ma Atinae Eseese.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, o lena e tu i matagiolo e fuafua ai le faasalavei solo mai a le aualii la e le talafeagai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O le mea lea sa fesiligia ai, o le tatou uafu i tai i le uafu i Matautu o le SPA, e ISPS comply, lona uiga e International Ship and Port Facilities Securities Code o la e lavea i totonu i lalo o le IMO Regulations, lalo o le Tulafono lena, o lona uiga, o mea uma lava e faatino i tai, o lena e follow i le polokalame lena. Aua e te popole.

Ona ou oo mai ai lea, ou te iloa o le amataga o leí ..

Afioga Toeolesulusulu Cedric Pose Salesa Schuster: Lau Afioga i le Fofoga Fetalai faamolemole lava.

FOFOGA FETALAI: Ioe le sui usufonoí ..

Afioga Hon MANUALESAGALALA MATI TUIGAMALA ENOKATI POSALA: E te le i taua i sau saunoaga leí ..

FOFOGA FETALAI: O le ala lea o le tau faalatalata atu le sui usufono mo Aana Alofi Nu. 3, malilie sui usufono o lea ua saunoa malamalama ona o le tatou taimi, ua manino, e le tulituliloaina, ma e le o ni ai i avea outou finagalo, o le a tatou ave le faatuatuaga i le Minisita e pulea mea tau uafu ma le Minisita o Faatoaga o lo o faagaoioia ia tulaga uma.

Tulai mai le Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Ona ou oo mai laia i le tatou Pulega o le Suavai. Ia o lo o faatino lava galuega masani tulaga o tatou polokalame o lo o faagaoioia nei. O le tasi lea atugaluga o lo o i ai, o a tatou boreholes lea na ou taua ona ua amata e i ai Lalomanu ua amata ona faasua lua i mea nei o pore holes. O Savaii e ova ma le 70% o lo o faamoemoe i vai e vili mai lalo o le manava o le eelele, e leai loa le suavai lea ona faaletonu lea. O le ala lea o le taumafai atu i afioaga o lo o maua ai le suavai ina ia galulue faatasi ma tuumamaina ai le faalagolago i le vai lea. E manatua e level faatasi ma le sea level a alu alu ua pau i lalo e manatu o le sami ua faatumu ai lea e mafua ai ona faasualua. O lona uiga a oo ina sualua, e ono afaina ai laau toto ma le tulaga o minerale, o faaletonu ia o lo o popole ai. Ina nei tei ua tatou naunau tele e tavili, tavili ae mulimuli ane i le isi 10-20 tausaga o humanai o i ai ni faaletonu ona afaina ai lea mo le long term lea e talanoa atu ai. O le tatou polokalame o lo o faaaauau le viliina o le vai i Faleasiu, o lo o i ai foi le vai mo Salega, ua uma ona identify le location e tu ai, lea o le a tatala le auala ma faafaigofie ai le faatinoina o lea vaega.

O tatou galuega o lo o faatino i le faiga paaga a le tatou Malo ma le JICA, o lo o faatinoina lea i Tapatapao ona e lua vai mama o lo o i ai. O le vai mama sa faatino muamua lea sa tatala e fai e le EU ma le vaega o lo o galulue ai nei le JICA.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O Tapatapao i le vai o lo o fai nei, o lo o faasau ai le vai e agai mai tai i Falelauniu, o lena ua amata ona faatino, a outou agai atu i le itu lea o lo o ua amata faataatitia mai paipa mo Falelauniu, Tapatapao ma se vaega o Siusega. O le vai lea na faia i le fesoasoani mai a le EU ua amata ona alu agai Alesia, o lo o i ai le faamoemoe mo Faleasiu uta ma nisi o vaega o Faasitoo uta, o lo o ua amata faatino ma faataatitia nei paipa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, lau Afioga i le Minisita masalo ua misi ia oe ae sa ou taua le vai vili mo Gataivai. O le faasologa o galuega na tau mai ia te au e le Pulega o le Suavai, a uma Faleasiu, Falelauniu, Gataivai a o lea ua e taua Sagone ae le o i ai i le lisi. Faafetai.

Afioga Hon MANUALESAGALALA MATI TUIGAMALA ENOKATI POSALA: E i ai lava nai faaletonu o lau lisi tusitusia lea e i ai, ou te tapa le lisi o i ai le faatulagaga, ae aua le atugalu a oo atu loa i Savaii ua fai uma lava mea i Savaii. O le tasi lea o galuega o lo o faatinoina nei o le vai i Vailima ma faasolo mai ai i lalo ma agai mai ai i Api. O galuega uma nei o lo o galulue faatasi ai le Malo ma le Malo o Iapani. Ia faatasi ai ma le fuafuaga e pamu le vai agai luga i Magiagi, Vaivase uta, Moataa uta, o galuega tetele nei o lo o faatinoina ma le faamoemoe o le 2016 po o le faaiuga ua maea ona faaleleia lea vaega. O i latou sa laga mai le taatiaga o nei paipa, leai, e ese lava le mea e agai ai Tapatapao, e lua vaega o galuega o lo o faia i Tapatapao.

Ona oo mai ai lea o lau faasologa i le Faalapotopotoga o Vaaí .

Afioga Tafua Maluelue Tafua (Aleipata Itupa i Lalo): Malie lau Afioga i le Fofoga Fetalai ona o lea o le a see ese le Afioga i le Minisita, leai e le faalavelaveina lau saunoaga. Ua ou tulai atu ma le agaga faaaloalo ona sa taua i lau tuualalo anapo le suavai o nai o matou alaalafaga i nuu a uta e amata mai i Utufaalalafa, Saleaumua, Lotopue, Mutiatele ma Satitoa o lo o faatali lava i le sua timu vaeatu le paia o le Maota. E talosagaina ona sa vili le vai e pei ona ou taua i le taimi sa i ai se tasi o tamalii o le Itumalo i le palota, peitai na uma loa ua le manuia le palota ma faamuta ai foi ae sa maua lava le suavai, ae fia maua mai se tali faamolemole.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, o le a agai lava i ai aua o le tasi lea taua o le auala sa faia i uta i Samusu i Lalomanu e mafai ai ona faataatia le paipa mo le agai i tai ma fesootai atu ai i Tiavea po o le a lava se fuafuaga i ai, ua maea le auala a ua aoga foi o le a fuafua i ai nisi o a tatou polokalame e fesootai ai ma lea vaega.

O le Faalapotopotoga o Vaa o lo o tumau pea le faagaoioiga o galuega, o le mitamitaga ona o le tatou auaunaga o lo o mafai ona oo atu i nisi o motu o le Pasefika e pei o le Atu Kuki, Toelau, Tutuila ma Manua.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
- felafolafoaiga i luga o le faitauga faalua

O le vaiaso fou foi, e tolu vaiaso e toesea ai le Lady Naomi e faaaoga e le Atu Kuki e felauai ai le Festival la e fai ai ma ua avatu ai le tatou vaa e lau ai tagata mai Pukapuka ma isi uma vaega ma ave i le mea o lo o faia ai le latou festival. O le tasi lea itu taua e lautele ai le auaunaga a le Faalapotopotoga o Vaa.

O le tulaga i Uafu i Mulifanua ma Salelologa, o lo o faagasolo lava, e i ai foi le finagalo lea sa aumai le sea points, o lo o ua computerise le system, o lona uiga o le tasi lea vaega o le a vaavaai i ai o e frequent travellers, atonu e tilotilo i ai, a alu atu ae fai mai le masini e le peep mai ae fai mai -afio maiø Lau Afioga i le Fofoga Fetalai, pei o le tulaga lena i lipoti ma mataupu sa laga mai.

O le tatou Faalapotopotoga o le Malosi Faaletise, o lo o faaauau pea poloketi o lo o renew po o le energy i kamupani o lo o galulue faatasi po o IPP po o Independent Powers Producers ia ua filifilia e mafai ona faatau mai e le EPC tulaga o a tatou eletise. O le vaiaso nei e taunu mai ai afi fou e tolu mo Salelologa e faaleleia ai le auaunaga. Ua uma foi ona tapunia le tender o le 100% renewable mo Savaii, ua uma ona tapunia mo le silafia e le o mama i le Malo le faagasologa o polokalame mo le motu o Salafai. Ona pau kamupani sa tauofo mai o le Solar, sa i ai le manao e omai nisi vaega ae peitai e faalagolago lava i kamupani ma le latou agai mai, o lo o faatino le valuation a le Faalapotopotoga e vaavaai ai mo se tulaga talafeagai mo le tatou Motu i Salafai. Atonu o le aotetele lea o mataupu sa lagaí .

FOFOGA FETALAI: Malie le Minisita, se i tuu atu lava le avanoa i le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Faafetai lava i lau Afioga i le Minisita ua tele nei galuega ua e saunoa i ai, malo le galue mo lenei tausaga. A o lea ua e oo tonu lava i le vaega lea o le Solar, ou te fia fesili atu i lau Afioga, ua maua tala e eseese tau nei e faatau atu ai le Solar i Matagaluega, e tai 70sene, 59sene, 77sene o le a se faamalamalamaga a lau Afioga? Muamua, e matua taugata tele lea tau pe afai e sao o le tau lea e faatau atu ai, ou te talitonu o le tau lea e gaosi ai hydro na o le 30 i le iunite, penisini 90 i le iunite, ae afai e sili i le 70sene e faatau atu ai le Solar, e tatau ona toe tagai lau Afioga po o talafeagai lea tau.

Susuga Hon Papaliitele Niko Lee Hang (Palota Taitoatasi): Lau Afioga i le Fofoga Fetalai, mo le faasaoina o le taimi o le Afioga i le Minisita, ua ou tulai atu ma le faaaloalo ona ua ou ou tuai mai i lenei taeao ae ou te le i maua pe na afea e le Minisita le auala o le Aoga a le Ekalesia Katoliko i Malololelei o le Devine Mercy, po o i ai se fuafuaga mo le faataina o lea auala.

Ma lou faaaloalo lava.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon MANUALESAGALALA MATI TUIGAMALA ENOKATI POSALA: O le tulaga e pei ona saunoa i ai, ua maea ona i totonus o a tatou fuafuaga o le auala ma le suavai ae lafo maia le faatuatuaga.

O le mataupu lenei i le tau, o lena ua faamanino atu ona sa faasalalau i tua ma aumai tauofoga. O mea nei o solars ma panels e le o ni mea taugofie e taugata tele. E le mafai ona faatino e tatou, o le fesoasoani mo le agai mai o kamupani mai fafo lea e mafai ona faatino i ai, a o le laugatasia foi a lea o lo o o ai isi atunu i mea tau renewable energy i le tau lea na ou faataitai. Afai e masani ona e alu e faatau lau iunite e \$50 ae 40 iunite po o le tausaga na tea nei po o le lua ea tausaga talu ai, a e toe alu i le taimi lenei o le \$50 e 55 au iunite. E te iloa e i ai le va o le eseesege lena ua i ai ae a tuu i pasene toeitiiti 20 i le 30% ua eseese ai le tau mai le tausaga ua mavae i le tausaga lenei. Ae a fai loa le review, ona omai foi lea i le Kapaneta e tilotilo i ai, ua leva ona malomaloa foi ma fai mai pe pau, ae silasila i ai pe a e alu e faatau sau iunite ona e iloa lea fai lau faamasinoga o la e faafogfa mai le atunu, o le tulaga o lo o taumafai i ai o le talafeagai ma gafatia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fatalai, o le mea lea e fai e le Faalapotopotoga ma le Minisita, o lea e alu i le mea foi lele aua le tuua uma au fuamoia i le ato e tasi.

O lona uiga e tatau ona toatele latou e aumai i totonus, a faaletonu mai le isi a o la e steady mai le isi na te supply ina le tatou eletise. E le tutusa foi auala o lo o faatino e latou, o isi kamupani faatoa amata ona gaosi le eletise pe a oso ae le la i luga, a o isi solar, na ona malamalamama lava amata loa ona gaosi le eletise. E eseese faapena le tau, a o le mea o lo o taumafai i ai le Malo ina ia tele latou e eseese a latou metotia, a eseese foi metotia e eseese foi a latou tau, ona pau lava le mea ia silasila lelei le Faalapotopotoga ina ia aua nei toe alu i luga le tau a ia fai lava ma alu ane i lalo le tau aua e le o toe faalagolago tatou i suau e fesiisiitai le tau. A o lea e gaosi le eletise mai le la, a o le la o le meaalofa mai le Atua e leai se tau.

Tofa Levaopolo Talatonu: Lau Afioga i le Fofoga Fatalai, se i tau faapulapula atu lava. E taua tele le mea lea e saunoa mai ai le sui usufono ona o le matau foi lele faapea e ao ona pau i lalo le tau o le eletise mai le solar. E faigofie lava le faataitaiga, a faapea e 2mika watts le malosi e fia manaomia i le afi moli a o lona tau po o le silia i le \$4milliona, a o le 2 meka uati e fai i le solar e \$10milliona, o le eseesege lena. E fai lava sina tele o tapenaga o mea tau tupe e faatino ai lea vaega ae le mo le taimi nei tatou te o ai, a o le lumanai ina ia feola mai a tatou fanauí po o le na o le 2, 3, 4 tausaga ua kava lea mea ona palasi ifo ai lea i lalo lava. O le faamalamalamaga lena lau Afioga.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon MANUALESAGALALA MATI TUIGAMALA ENOKATI POSALA: O lau fesoasoani foi lea i le sui usufono mo Faleata Sisifo ia fesili ane i le sui usufono mo Gagaemauga Nu 2, ma faamalamalama ane ai le taua o le polokalame ua oo i ai.

Ona ou oo mai ai lea i le Pulega o Malae Vaalele, o lo o ua faatino galuega i le tulaga o a tatou Malae Vaalele i Maota, Asau

Ona ou oo mai lea toe lava o le Pulega o Malae Vaalele, ia o le Pulega o Malae Vaalele, o la ua faatino a tatou galuega o tulaga o tatou malae vaalele o Maota, Asau, ia ua lelei ma atoatoa. E faamoemoe foi o la ua amata ona nofoia e le Kamupani lea o le a faia le tatou Terminal Project lea i Faleolo ma ua faagasolo foi ia polokalame, aemaise o le faiga o le toe upgrade ina o le long way ma le airport. Ia o mea na o le a agai i ai i le faaiuga o lenei tausaga ma tatou polokalame ina ia faaleleia le malae vaalele mo le uunaiina o tatou atinae ma le tamaoaiga o le tatou atunu.

O le malae lea i Aleipata lea e fuafua, ia o la e fai fesootaiga ma pulenuu, ua maua mai foi le tali, ua matua fiafia lava o tua i le faamoemoe lea, aua i lau vaai na ma talanoa foi ma sui usufono mai tua, ia e vaai atu o le polokalame lea o le a fai, ua lelei le auala i uta ia o le a o uma i uta e nonofo ai, ia ae faavagavaga ia fanua ia ma eleele e fai ai ia mataaga, fai ai ia polokalame faa-Tagata Tafafao Maimoa Mai Fafo, ia galulue i uta i faatoaga toe o i tai. Ia ua e vaai i le taua o polokalame ia ua agai iai, ia e talafeagai foi ma fuafuaga lea mo le tatou malae vaalele, ua faatalatalanoa. O la o le a fai le fua ua uma ona faailoa le mea e tatau ma talafeagai e tu ai le malae vaalele, ona faatalanoa lea ma aiga, ae ua matua aumai le lagolago mo a tatou polokalame ma fuafuaga o lo o faatino. Ia o leí .

Afioga Hon Palusalue Faapo II: Lau Afioga i le Fofoga Fatalai, o se mea e fia faamalamalama.

FOFOGA FETALAI: Ia tulai mai le Afioga i le Taitai o le Itu Agai.

Afioga Hon Palusalue Faapo II: E taua tele le mea lea ua oo i ai i le malae vaalele i Aleipata. E lelei o lena ua fai ia suesuega ma pulenuu, ae a silasila i ai i lou nofo ma ou mafaufau, afai e lima minute e ta te alu ai i Tutuila ae lua itula e te drive mai ai i Apia, ou te le iloa la po o fea e sau ai lea manatu e tatau ona fai se malae vaalele i Aleipata. E lima minute i Tutuila, taunu i Aleipata ae ave mai le taavale i le lua itula, silasila, ia po o le tasi ma le afa po o le aí .e tasi ma le afa e le tasi. Ou te le iloa la po o fea e aumai ai le manatu lea. E taugata ma 1 saogalemu leí ..

FOFOGA FETALAI: Malo. Se i tuu atu le avanoa i le Afioga i le Palemia. Tulai mai lau Afioga i le Palemia.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Susuga Hon Tuilaepa Fatialofa Auelua Luplesoliai Aiono Neioti Sailele Malielegaoi: Lau Afioga i le Fofoga Fatalai, e lua a tatou ituaiga vaalele, o vaalele ia e i le va o le 9 i le 20 pasese e faimalaga i le na o Samoa e lua. O lona uiga o le tele o le malae vaalele lea e fuafua e faapitoa mo vaa ia i le va o tatou ma Tutuila.

O lona uiga, e tai pei lava o le tele o le Maota ia le malae vaalele lea e fuafua. E lua a tatou vaalele na pau ma maumau ai le soifua, o le vaalele lea na pau mulimuli, na mafua ona pau, ua puaoa le aso ma ua le mafai lava ona iloa ifo se mea i lalo i Fagalii, ona lele loa lea i o i Paleolo, lele atu lea i Paleolo, o la foi e puaoa Paleolo, ona toe taumafai loa lea e toe tuli mai Fagalii, tupu ai loa ma le faalavelave ona ua le oso mai tai i luga o le sami ae ua oso mai uta ia le vaalele, pei o lana masani i le puipuiga. Sa tatau ona oso mai luga o le sami, aua e leai ni laau tetele o i ai, a maualalo le mea e lele ai ona taia lea i niu paoga. O lea la na oso mai ai i uta, o lea na tatou iloa uma faamatalaga ona sa soifua mai ó le Pailate lea lagolago sa finau i ai i le kapeten'i oso mai tai. O le kapeten'i la, o ia lena e na te aoaoina isi pailate, ae ua toatamai la le kapeten'i ma faapea, na o le pau lava le mea o le faalogo, o lea e train ina uma ia pailate o lea lava na te iloa le mea lea e fai, ia ona lele pogisa mai lava lea o le vaa, na ona malama lava o le va o puao, ia vaai atu loa, ua vaai i tafue o laau i i uta o Moamoa.

Ua ala ona fai atu le faamatalaga lea, o le tau faamalamalamaina, ou te le iloa po o ua faafia ona faamalamalama, e moomia se isi malae vaalele e tua i ai ia malae vaalele ia ma faasaoina ai le soifua. Ae a oo lava ina pisi ia femalagaiga, o le mea lena e masani ona tulai mai ai faalavelave i i. O fonotaga ia a le Metotisi, o fonotaga a le EFKS, e masani ona toatele le atunuu e malaga mai ai mai Amerika i le Hawaiian Air. Afai lava e toatele ni tagata Aleipata, Lepa, Lotofaga, Safata e fia malaga mai i le tulaga faavavevave, e faigofie le lele mai i Aleipata ona omai ai loa lea i i i Safata ma Falealili i lo le tau omai mamao i Apia ona toe o atu ai lea i tua. A o le faaaogaina tatau lava o le mafaufau mamao agai i luma, o mea ia, e le mafai, le mafai, le mafai ona soloia le mea lenei, i le agai atu i le afe tausaga o lumanai, ona tulai mai lea o Aleipata o le isi lea aai tele, leaga foi e le mafai ona aveesea le tulaga vavalalata lea e fesoottai ai ia Samoa e lua, Samoa i Tutuila ma Samoa i inei. E le mafai ona aveesea lena mea. O mea e aupito sili ona vavalalata ai ia atunuu, o i ina foi e agai i ai le fesoottaiga vavalalata i vaa a lalo ma vaalele sefe ai le tupe. Se ou te le iloa, ua faamatala faafia nei mea, o la e malamalama lelei lava ia le sui usufono mo Faleata Sisifo. O e malamalama Leala? E malamalama lelei Leala, se, se i fesoasoani ifo ia i la outou Taitai.

Tofa Lealailepule Rimoní Aiafi: Lau Afioga i le Fofoga Fatalai, ona o lea uaí .e sao le Afioga i le Palemia.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Sa ou fautua i le Taitai o le matou vaega, a oo i le taimi e te saunoa ai i le malae vaalele e taofi, aua e te saunoa i mea tau Economics, leaga o le matafaioi lena a Tuilaepa, alu i mea tau Safety leaga o oe o le Air Traffic Controller, o le mea lena na e pasi ai i o, e te oso loa i Safety, faalotolotolua loa le Malo, a e alu i Economics, e le mafai ona e malo. Ia o le fautuaga lena, a o lea ou te malamalama.

Afioga Hon Palusalue Faapo II: Lau Afioga i le Fofoga Fetalai, o le mea tonu lava lea o lea ou te tau tulai atu ai lau Afioga i le Fofoga Fetalai, leaga o lea ua talanoa mai i mea tau vaalele, a o lena ua i ai lou poto, lou iloa i mea tau vaalele, ioe.

Lau Afioga i le Fofoga Fetalai, o lea ua talanoa maií .

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, a talanoa loa i le Safety le mea tonu lea e faapitoa i ai le Taitai o le Itu Agai, ona talanoa loa laia i auala e faasaoina ai le soifua o tagata, a lea faatoa uma ona ou talanoa atu ai. Ua galofa a ia te oe. Ina ia faasaoina le soifua o tagata mai le taimi e puaoa ai matimu. Ua iloa foi, e le la pea aso, e i ai pea aso e timu ai, ona taua loa lea o le malae vaalele lea. O lea foi la ou te talanoa atu ia te oe i le Safety. Aua e te talanoa mai ia te au i le Safety. Aua foi e te toe talanoa mai ia te au i mea tau atinae. Ae talanoa mai ia te au i mea tau aoaoga.

Afioga Hon Palusalue Faapo II: Lau Afioga i le Fofoga Fetalai ma le faaaloalo lava.

FOFOGA FETALAI: Malie ia le Taitai o le Itu Agai o lea ua malamalama le mataupu.

Afioga Hon Palusalue Faapo II: Leai o le mea lea e saunoa i ai le Afioga i le Palemia, fai mai, mo le afe tausaga i le lumanai, silasila lau Afioga i le mea lea, e le iloa pe oo atu i le afe lena ua fesootai tatou ma Tutuila ona o le suiga o le tau lea e i ai nei, a o lea e te fuafua, e tatau ona fuafua mo le taimi lenei. O mea lololo ia o lea ou te fai atu ai i lau Afioga i lau Pakeki, o mea lololo ia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faalavelave o le vaega lenei, e le faataotoa ni ana fuafuaga e gapa mai i le umi o le isi Faiga Palota. E leai. O le vaega lenei e faataotoa fuafuaga mo augatupulaga o lo o lumanai, le isi augatupulaga, ma le isi augatupulaga, ma le isi augatupulaga. Ae le o faataotoa ni ana fuafuaga mo ni palota e maua mai i le Palota lea mo le tausaga fou. E le faapena la le vaega lenei, e vaai mamao, e le pei la o oe, e te vaai pumoomoo.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon Palusalue Faapo II: Lau Afioga i le Fofoga Fetalai, e toe tasi lava le mea lea, sa ou faapea e aoga mea tutupu e silasila i ai le Afioga i le Palemia, silasila i le uafu lea e i ai neií .

FOFOGA FETALAI: Faapea ua uma ona tatou taua lea mataupu.

Afioga Hon Palusalue Faapo II: E leai ma seí .sa ou faapea la e manatu, a fai foi la se isi malae vaalele, o le mea foi le la e tupu ai, e tele tupe e alu ai e maumau tupe.

FOFOGA FETALAI: O lea ua manino le folasaga a le Malo, se i avatu lava le avanoa i le sui usufono mamalu mo Aiga i le Tai.

Susuga Ifopo Matia Filisi (Aiga i le Tai): Faafetai lava lau Afioga i le Fofoga Fetalai, ou te iloa e eseese foi lava ia sui usufono i totonu o le Maota lenei, leai, o le sui usufono mo Aiga i le Tai e le faauilavea soo, pau lava le meaí malie lau Afioga i le Minisita, ou te iloa o lea ua saausi lau saunoaga, ma e i ai foi lou talitonuga, malo faafetai lava, faafetai i lau Afioga i le Minisita o lea ua faalogologo mai lou itumalo e tusa ai ma le mataupu lea i le motu o Manono, ioe, po o le matou itumalo e tusa ma le package lea ua avatu atoa lava i le vai, auala faapea o taligalu ma uafu. O le mea lea ua faamalulu atu, sa faatalitali lava se i saausi, pau le mea ou te faamanatu atu, o le isi au Matagaluega lea o le SPA lea na matou o e fai le lipoti lea taamilo pei ona fesoasoani mai le uso foi ia le Afioga ia Faumuina e sue ia uafu ia i le faiga o le tatou auala, ma o la e ia i latou le lipoti. O le lipoti tonu lava lena, pau lava lea o le ava, e tau le vaa i le motu e leai se papau pe afaina ai vaa tetele o tai lea i le Satuilagi ma Apai, ae malo faafetai lava i lau Afioga. Faafetai foi o lea ua faalogologo mai le itumalo, o le tatalo lava, a lea na avatu foi e tusa ai ma le lauga ananafi. E le o naunau foi, ma o se tupe tele lava e alu i lea faamoemoe, ia e fai soosoo, ioe, fai faa-phase foi lele, phase muamua, phase lona lua, manuia le Fono, faafetai.

FOFOGA FETALAI: Malo. Ia se i avatu le avanoa, malie lava le Afioga i le Minisita e faasao lou taimi. Tulai mai le sui usufono mo Alataua Sisifo.

Afioga Lafaitele Patrick Leiataualea (Alataua Sisifo): Lau Afioga i le Fofoga Fetalai, masalo o lea e maitau atu ua latalata i siui ia saunoaga foi a le Afioga i le Minisita, e leai se agaga e fia faalavelave i le vaega lea, sa maitau lava ma le totoa. E i ai sau mataupu na avatu ananafi e laitiiti lava sau mataupu, e pei lava ona talosaga atu ou te le i fai atu e fai nei, ae sa avatu lava ma le agaga maualalo ona o lenei nuu e fai sina pogisa o tai i le aai ma uta. Ia o le ala lea o lau talosaga masalo po o ua galo ia oe, ia pe e te le manao foi e faamau, a o le faigofie ia o lau mataupu.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O moli auala nei masalo e le atoa se \$10,000. A silasila foi i le taimi ua sola, aua o le sefulu tausaga talu ai na o atu ai foi le Matagaluega ma aumai moli ia sa i tai i le aai, masalo o tai i le aai na i ai moli ia ma uta, ua le iloa po o fea ua ave i ai moli ia, o la e oo mai lava i le taimi lenei o la e pogisa. A o le matou faamanatu atu lea lau Afioga i le Minisita, o lau mataupu, ia se i i ai se isi taimi fai, a ia fai, ae ou te le o fai atu e fai i le taimi lenei, leaga o lea e maitau atu o le a faaiuiu lau saunoaga.

FOFOGA FETALAI: Tulai mai lau Afioga i le Minisita.

Afioga Hon MANUALESAGALALA MATI TUIGAMALA ENOKATI POSALA: Ua tau sola foi manatu e tau faauma ai le lauga ona o le tulai soo mai o le Itu Agai.

Ae leai, pei lava o le mea o lea ou te tau matau atu i leí .pei o la e agai tele le finagalo o le Taitai o le Itu Agai i Apia, fai mai a sau mai o i Tutuila nonofo i Aleipata drive mai i Apia. Ae a faapefea la Aleipata? A sau la i i i Fagalii toe alu lea i o i Aleipata i le lua foi itula, o taua uma e ta te omai mai tua, e tatau foi ona ta lagolago foi aua ia lo ta manuaí ..

Afioga Hon Palusalue Faapo II: Lau Afioga i le Fofoga Fetalai o se mea e fia faamalamalama. O lona uiga o lo o fai ia le malae vaalele mo Aleipata, ae faapefea Samoa atoa? Pe Aleipata e fia sau lava i Apia. O le mea lea e matua le make sense ia le malae vaalele lea, e le make sense, no logic.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, o lea la, e agai lava ae lilifa lava i leí .ae le vaavaai e vice versa le alu o le mea, e sau i i toe alu agai i o, o tagata tafafao maimoa mai fafo lea e agai i ai le faamoemoe lea.

O le tulaga ia tatou street lights, o mataupu nei e agai le talosaga i le EPC, e mafai ona tusi mai ia au ae fia malamalamama po o fea tonu le vaega e moomia, aua e le mafai ona o atu au aua o va o nuu nei o Neiafu e tau i tai e fia maila le umi, a o lo o moomia e mama ai le galuega. E alu le asiasiga ma fai le latou lipoti ona aumai lea i le CSO Komiti lea e i ai e fai ai le faaiuga, ae a tauai mai faapea ma le malamalamama ó e le mafai foi ona ou alu au i tai e tusitusi a o lo o i ai lava le mea faigofie ma avatu ai foi lau lagolago a ua uma le lauga.

Out e fia oo i lou itumalo o lo o tapuai mai, faamalo tapuai. Ou te faafetai i le Minisita mo Faatoaga ma Faigafaiva ma le Matagaluega, ona ua ou vaai e tele le fesoasoani lea na maua i le faasoaa lea sa i ai ua tofu uili paelo uma le Itumalo ma le tele o mea e faaaoga e fesoasoani ai i a latou faatoaga ma tulaga uma na.

Faafetai i le Minisita o Aoga, Taaloga ma Aganuu ma le Matagaluega, ona ua faagaoioi le galuega o le Aoga a Mulivai, ua faamaea le faleaoga o Vaiee, ae o lo o fai le faleaoga o Lotofag a o lea foi ua i ai le fesoasoani tele mo le faleaoga i Saanapu.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Faafetai tele, o le faamoemoe o se taimi o lenei tausaga e faatino ai nisi polokalame tetele o sao o le Malo o lo o uunaia ai faleaoga ma le aoaoina o fanau aemaise o le tatou Kolisi i Saanapu.

Faafetai i le Minisita mo le Soifua Maloloina ma le Matagaluega. O Saanapu ua i ai le Falemai ou te iloa e le gata ina aoga mo Salamumu, Saleaula, faapea ma Lefaga ma le agai i Siumu. Ou te iloa ua maea ona faia feutagaiga ma le Afioga Anapu i lona fanua e tu ai faatasai ai ma le lagolago a lo matou nuu o Saanapu, o lena ua faia ai lea atinae mo le faaleleia o le falemai mo le itumalo aemaise o fafo atu e pei o Saleaula ma isi vaega uma. E momoli atu ai le faafetai tele o le a ou le taea nisi o polokalame e tetele o lo o faaaauau i totonu o lou itumalo, faafetai i le Malo ma le amanaia o le itumalo o Safata. O la matou tatalo i le Atua ina ia alofagia le Afioga i le Palemia ma le Malo ma ana polokalame o lo o faaaauauina pea. Faafetai.

Afioga Hon Palusalue Faapo II: Lau Afioga i le Fofoga Fetalai, a o le i uma le saunoaga matagofie a le Afioga i le Minisita, o lea ua faafetai i isi Matagaluega, ae faapefea a tatou auala galue lea e feagai ma lau Afioga? Ia saunoa ifo i ai, o le auala galue o Sataoa, Lotofaga, Niusuatia, Vaiee ma faasolo atu ai i le la itu, saunoa ifo i ai ma e faafetai ia oe o le la o le a fai.

Afioga Hon MANUALESAGALALA MATI TUIGAMALA ENOKATI POSALA: Lau Afioga i le Fofoga Fetalai, sa aumai foi lou finagalo e fai muamua isi. O ia la na taulai ai lau vaai ona fai mai e fai muamua nisi, ae leai o lea e ese le finagalo o le Taitai o le Itu Agai ae na ou faapea o le Taitai o le Itu Agai e tatalo i o, aua nei manatu mai i le itumalo ae agai. Ia se i silasila o ao sinasina uma o Savaii lea e i talaluma uma o lo o lagolago ia te ia ae pei e le o manatu ane i ai. Ma le faaaloalo.

FOFOGA FETALAI: Ia sauni lelei le lua paga. O le agaga ma le faamoemoe e le mafai ona natia ifo i fatualavai. Faafetai atu i lau Afioga i le Minisita o Galuega, Felauaiga ma Atinae Eseese, e i ai le talitonuga e le i soona filifilia foi lau Afioga e le Palemia ona e manatu e lava le tofa ma le faautautaga, malo le galue, malo onosai o le tasi lea o Matagaluega tele a le Malo. Ia ua i lilio vea ma iloa taiao i lau galuega faatino, faamalo atu foi i Ofisa Sili o Pulega ma Faalapotopotoga Tumaoti a le Malo o lo o i lalo o lau vaavaaiga, o le ivitu lea o le tatou Malo o atinae tetele.

E faaleoina le agaga faafetai o le Fofoga Fetalai, faafetai mo le auala o lo matou nuu o Aopo ua ou vaai atu ua sau i le lisi tautuana ane ma lau Afioga o le maila o lenei nuu e le i ai lava le auala galue, faafetai ua ou maua i le taeao nei ua tefa le tauala i lau Afioga i le Minisita o Galuega, Felauaiga ma Atinae Eseese, o le auala e tau o le Maila pe fa po o le lima maila le tele ae lafo atu pea.

Tulai mai lau Afioga i le Minisita o Aoga, Taaloga ma Aganuu.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon MAGELE MAUILIU (Matagaluega mo Aoga, Taalogia ma Aganuu): Lau Afioga i le Fofoga Fetalai, ou te fesili atu i lou finagalo, ae a pe a tatou o e inu le tatou ti ona omai ai lea ou lauga, e le lelei foi se lauga ae vaelupeina, ae o le a amata atu ia.

Ou te manatu ua uma ona faataoto i le agatonu paia o le taeao lea na saunoa i ai lou uso a Minisita, ona ou manatu lea o le a le toe asia utumaau. Ou te faatalofa atu i lau Afioga i le Fofoga Fetalai, faatalofa atu i le Palemia, Sui Palemia ma le aiga Kapaneta. E avatu lau faamalo tele ma lau faatalofa i le Taitai ma le Sui Taitai o le Itu Agai ma sui usufono mamalu uma o le Palemene.

Ou te faatalofa atu i le tapuaiga a Ofisa Sili o Pulega o Matagaluega ma Faalapotopotoga a le Malo faapea foi le Failautusi, Sui Failautusi ma le aufaigaluega a le Ofisa o le Fono. O le tapuaiga a Samoa aemaise o le tapuaiga a lou nuu ma le Itumalo, e faatalofa atu.

Ou te avatu le faafetai tele i sui usufono na afea lenei Matagaluega ia outou saunoaga. Sa ou faalogologo lava ma le totoa ma e taua tele ia te au la outou tuualalo ma le faamanatu aemaise lava o le agaga o le tatou galulue faatasi i le atiaeina o aoga aua se manuia o le tamaoaiga o le tatou atunu e ala i aoaoga.

O le taua ia te au, ona a ou vaai atu i le Maota lenei, ou te talitonu e leai ma se sui usufono na faigofie le ala na ui mai ai i aoaoga. E tofu lava tatou ma tala malie ma tala o le fit . O le taimi foi lenei, e leai ma se isi o sui usufono o le Maota e le i sikolasipi sona alo, tasi, lua, tolu, fa, lima, ono, fitu, valu, iva, fanau a isi na sikolasipi uma. O le taua lena ia te au, aua foi o lo o faafogafoga mai Malo mai fafo o lo o tatou fai paaga ma avatu le tala i fafo. O Samoa e faataua ia te ia le vaega 26 o le declaration of human rights 1948 lea e faapea mai, Education is a fundamental right, its not a priviledge. A ou vaavaai i le Maota lenei e faigofie lava ona faapea mai sui mamalu o le Maota, o le a le mea ou te popole ai fua i fanau a lou tuaoi? O le a le mea ou te popole ai fua i fanau a lou nuu? O le a le mea ou te popole ai fua i fanau a lou Itumalo o lea ua ou lelei au? A o lou faalogologo atu i lauga, e le o le mea lena o lea e tupu. O le mea lea e tupu, o lea ua tatou omai e opogi faatasi le taumafaiga o lea tatou te matimati faatasi ina ia maua e le tamaititi lana aiatatau lea e aoga ai. E le na o se aiatatau o e maua mea, e mafai ona totogi le pili, e mafai ona maua lavalava aoga ma fai isi mea ina ia o fanau i le aoga. O lea e faataua, e 49 sui usufono o le Palemene, o le mea aupito sili lea ma taua ia te au o le tala e ave i fafo, ona faapea mai lea o atunu mamao o Samoa la e taimua. Tuu atu i ai lo tatou tauau tatou te galulue faatasi. O lou naunautaiga lava ia alofagia e le Atua le Faiga Palota o lumanaia ina ia toe tutu mai tatou uma nei e faaaauai ai ona tatou matimati a tatou tonu ia ua fai tatou te o e e uunai mai aoga i nuu i tua, ina ia pei fanau o lou tuaoi, fanau a lou nuu, fanau a lou itumalo e pei foi o a tatou fanau, e leai so tatou manatu faapito.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faiatauga faalua

Lau Afioga i le Fofoga Fetalai, o le faitotoa o le siitia o le tamaoaiga o se atunu, o aoga. O le faitotoa o le siitia o le tamaoaiga o aiga ma tagata taitoatasi o aoga. O le folasaga ma le tautinoga maumaututu lea a le Faletupe o le Lalolagi i le folasaga na faia i le Fono a Aoga o le Lalolagi lea na ma auai atu ai ma le Ofisa Sili o Pulega o Aoga, Taalogia ma Aganuu i le masina ua mavae atu nei. O le talitonuga foi lea o le Faigamalo ma le Palemene lenei, e pei ona molimauina suiga televavave, o isi suiga e le i faigofie a o lea ua tatou omai faatasii e apoapo ma faataua ona o le naunautaiga lea.

O suiga ua tatou i ai, o suiga ia ina ia mafai ona matalatala ai faitotoa ia mo tamaiti uma lava o le tatou atunu, ae faapefeara ona fua? E faapefeara ona fua le faamuamua o ave e lenei Palemene i aoaoga? E faapefeara ona fua lau faasoa lelei, e atagia ai o lo o ave e lenei Palemene le faamuamua i Aoga? E fua i le GDP. E fua i tupe faaalu. I le fua faatatau o Malo Aufaatasi ma le lala o Malo Aufaatasi e nafa ma aoaoga, o lo o faataatia mai ai le fua e faapea, o atunu uma o le Lalolagi e aofia ai ma atunu mau oloa e tatau ona faaalu le 4% i le 6% le GDP mo Aoga. O Samoa i le taimi nei e 5.1% o le GDP lea ua faatatau mo Aoga. O lona uiga a o faafogafoga lenei Palemene, o lea e taatia lelei lava Samoa i le fua faatatau lea ua aumai e Malo Aufaatasi. O le isi fua faava o Malo e fua ai e Malo Aufaatasi, e tatau i atunu uma o le Lalolagi ona faatatau le 14% i le 20% o tupe faaalu/public expenditure mo Aoga. O Samoa i le taimi lenei o lo o tulai mai i le 17.06% tupe faaalu lea e faaalu i Aoga. O lona uiga foi, a fua i tupe faaalu o lea e taoto lelei Samoa i le fua faatatau faava o Malo, aisea? E leaga o tatou, o lena Itu ma lenei Itu, e avatu ai lau faafetai tele i lo tatou galulue faatasii ina ia tini lau o le faamoemoe. O lea toeitiiti pasia le Tulafono Tau Faaofi o le Faatatauina o Tupe 2015/2016 a tatou, e le taua na o lenei Itu, o le tala faasolopito o Aoga, o sui usufono nei e 49, e le faaititia le faafetai i lo outou lagolago i mea e tele o taumafai atu i ai.

O faiga faavae a le Malo i le faasoaina o tatou faiaoga, faafetai o lea e mafai ona lava pea le onosai a o faasaga atu le tatou Malo e atiae o tatou faiaoga ina ia tulai mai faiaoga e le gata ia lava le fuainumera, a ia anagata ma anoa mea ma a latou tusi pasi e iu mai ai. Toeitiiti lava ea le pologa o tatou i le faamuamua la e ave i le tatou Iunivesite. E i ai foi sikolasipi ua ave i fafo, o lo o i ai foi le polokalame lea ua fai e le USP e 63 faiaoga la e i ai, o lo o ave ai le Matematika ma le Saienisi. O lo o i ai foi ma aoga a le Eklesia. Ae ou te faamalo atu i le lava pea o le onosai a o faagasolo galuega mo fesuaiga. E taua tele faiaoga e lava tapena, ma o le faiga faavae ua i ai nei, e le toe sili lava le Samoa College i Faleata, e le sili Samoa College i Vaimauga, Mataaevave, Palauli. O le a tutusa uma le atinae o tatou top graduates mai le Iunivesite mai fafo lea o le a faasoaa atu i tua. E le toe i ai ni fanau e toe fia naunau mai a mea ou te alu i le aoga lea e sili atu i i, o le aoga lea e sili atu i i. O la e ututi a tatou faiaoga. Po o a ni faiga o taumafai le Matagaluega e fai le Science i lea aoga i le taimi nei, masalo pe toe lua ni tausaga ona toe foi lava lea i le mea o i ai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: E faamalulu atu i le Afioga i le Minisita, masalo ua taliga e fia logo le tuleiga ma le saunoaga aemaise le tali mai a le tatou Matagaluega, ae ona ua tatou taunuu i le tatou taimi malolo.

O le a faaauau le tali mai a le Minisita mo Aoga pe a tatou toe foi mai i le tatou malologa masani.

E faasilasila atu o le a faataatiaeuse Taualumaga a le Fono Aoao, mo lana malologa masani o le taeao.

Na faataatiaeuse Taualumaga a le Fono Aoao mo lana malologa masani i le itula e 10:45 i le taeao ma toe amatalia i le itula e 11:24 i le taeao.

FOFOGA FETALAI: Ia, e faapei o le malosi o le Agai ma lona siufogoa i lenei taeao, e manatu e faapena le malosi lea ua i ai le tatou Maota. E momoli atu le agaga faafetai tele i le paia ma le mamalu o le tatou Maota Fono. O lea ua tatou taunuu mai i le vaega lona lua o le tatou Fonotaga i lenei taeao. Malo le onosai, e manatu foi ua maea le taliga o le sua ma le tautega, ua maua le tatou faasiliga malosi. Faafetai i le Atua i kalasia ua foai e faaauau ai le tatou galuega.

Lau Afioga i le Minisita mo Aoga, Taaloga ma Aganuu, tulai maia ae se i sila faafogafoga le tatou Maota i le saunoaga i lenei taeao.

Tulai mai le Afioga i le Minisita.

Afioga Hon MAGELE MAUILIU: Lau Afioga i le FoFoga Fetalai, faafetai o lea ua maua le faamalositino i lau Afioga faapea sui usufono o le Maota.

Ina ua maea le afa o Evani, ona tapena lea e le Matagaluega o le poloketi e toe faafou ai faleaoga na faaleagaina, ona sau lea o le savali a le Matagaluega o Aoga ia te au, na taitai mai e le Pule Sili ma faapea mai; ðE le o le taimi tonu ea lenei e tuufaatasai ai nisi aoga?ð Ae muamua mai lava i le lisi le aoga a Mulivai Safata, e 60 tamaiti, ae a pe a fai le faleaoga fou i le nuu lea e tuaoi, ona o atu lea i ai ma Mulivai Safata? Ia e faapena foi Faleaseela. O le tuualalo lea a le Matagaluega o Aoga. Ia ona ou faalalolalo lea ma ou faamaulalo i le toeaina foi lea o Akamu Simifi, ona o lau tuualalo lea o le a ave i le Matagaluega o Aoga, e ese. O lau tali na ave i le Ofisa Sili o Pulega, manaia tele le tou magafagafa i mea faapea, ma o mea e tatau ona fai, ae faataatia mai i le taimi lenei, ona o aoga ua avea ma mitamitaga o nuu ona e leai se nuu e fia tapunia sana aoga, aemaise lava o le aoga lea a Mulivai, ou te manumanu tele i le faitotoa o lou ofisa, aua e muamua lava alu atu Palu kiki i lalo. O lea, taatia le tatou faiga lea se i toe asia i se taimi o i luma, a o le agaga ia o le tuufaatasai, o le mea e masani ai outou le au Economics.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O le aoga amata, e ese le taua. Ua ou fiafia lava ua talanoaina ona o lea ua agai i ai le tatou Malo. Ua aumai aoga amata i lalo o le faamalu o se aoga atoa, mai lava i lalo e tau i luga i le tatou Iunivesite ma Matata Eseese ona o i lea ua ave i ai le faataua a Malo Aufaataasi, ina ia oo atu i le tausaga 2030, ua o uma fanau i aoga amata ona o le taua o le vaega lea i le faasolo atu i aoga tulagalua. O le vaiaso na tea nei lea sa faalauiloa ai le tusi taiala e faalauiloa ai aoga amata i totonus o le tatou atunu, lea sa faapea ona faifaatasia e fono aoao a aoga amata ma le Matagaluega. Ua uma foi ona ave lau faatonuga i le Pule Sili ma le Peresetene o aoga amata, ina ia amata loa se galuega e tilotilo i le faavaa o totogi aua se fautuaga i le Kabeneta se i tilotilo i ai, ina ia aua lava ne i misia le tulaga taua lea o tatou aoga lea ua amata ona lelei, aua e pei lava o si vaega lea, ua amata laa atu le tatou Malo e galulue faatasi ina ia malosi mai foi le vaega lea. E oo i tatou aoga matata eseese, e tele talavou foi e i ai tagata ia e toulu mai le system, o latou foi ia o lea e i ai le tatou poloketi lea ina ia maua le avanoa e talavou ia ua leai ni skills e faapena ona maua lea avanoa. O tatou aoga o aliivaa ma tamaitai, maritime, e moni a au, o le mea tonu lava lea na ala ai ona fai le tatou Ocean Campus lea ina ia atoatoa ai vaega ia na saunoa i ai sui usufono mamalu. O ituaiga ranks_o tatou aliivaa i ofisa, o ofisa sinia ma faasolo atu ai i luga, ina ia tutusa tatou ma le aoga manaia lea o Kiripati.

O tatou malae taalo, o lena ua i ai si fasitupe i totonus o le paketi e faasoasoa mo tatou malae taalo, e fesoasoani mo aoga mo autaaalo. Tasi lea tupe tele a le tatou Malo e alu, o le ave o le fesoasoani e o ai nai tatou autaaalo i taaloga a le Oceania ma le tatou lava lotofale ma le Pasefika. O lo o ua i ai nei ia te au le talosaga mai le Matagaluega o Aoga i le Kabeneta, ina ia toe iloilo le pasene lea o le grant e ave i aoga, ina ia iloa o lo o lava tupe e faatino ai isi meaaoga, aua o le mea mautinoa lea ua ou iloa, o le tele o aoga e uma lava le tausaga faaletupe o la e manaia lava le teuga o latou tupe, o la e i ai tupe e le i uma ona faaaaoga. O le fua faaaliali foi lea o la e lava le tomai o Komiti o Aoga e iloa ai teu tupe, fai faamatalaga o tupe, ma faaaaoga tatau a tatou tupe.

Na taua mea o aoaoga o le Numera ma le Saienisi i TV. O lea ua i ai le tatou poloketi lea toeitiiti lava maea e tau o le School Net, lea ua alu i aoga. Ua soo uma kolisi ma faasolo atu i aoga tulagalua, e aoaoina ai le Numera ma le Saienisi. E i ai foi la ma le Igilisi, e tai pei se í í foi lele e te tilotilo atu ae aoao mai le Science. E fautuaina lava le mamalu o le Kabeneta, a outou o i o outou alaalfaga, ona outou asiiasi lea i a outou aoga, se i outou matamata i ai, e toe fia oso vave lava le fia aoga o le isi, o le faigofie ia o le Numera ma le Science, i lau vaai i ai, e ese le effective o lea ituaigaí ae aua ne i galo i le TV, lea ua sau ai le polokalame foi lea mo tamaiti lea sa outou faafogoga iai i le leitio. Ia ua tipi lena mea o le leitio, aua e le o iloa lava e se isi pe matamata ai se isi, a o lea ua faasau i le TV ma faasolo i aoga, tasi lena polokalame lelei. E i ai le lua tausaga talu ai sa taua foi se lala o le Iunivesite o Samoa i Savaii. Sa ou tapa le tatou Iunivesite o le latou tali, e le i sauni latou.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Ia o se mea lelei foi, e le aoga le fosi e o i Savaii ae le i sauni latou. O la e iai lala o le USP. O le mea lea ua maitauina nei i le faamatalaga a le USP, talu ona faalelei le satelite ma mea faapena, o le toatele o Savaii ua fia aooga, ua gasolo mai. Ae i ai foi la le taimi e lava ai tamaiti i Savaii, ona alu foi lea o le tatou Iunivesite i Savaii i le mea lava lea.

I le faaiuga o le tausaga nei ia Tesema, lea na ou talosagaina le USP, ave le latou graduation i Savaii e fai ai. O lea la o le a ave le graduation lea a le USP e fai i Savaii, ina ia faagaeetia ai foi tagata Savaii ia ina ia faaosofia ai tagata Savaii ina ia atili ona fia o e faaaoga le centre lea e i Savaii, alu atu ma le tatou Iunivesite i se taimi o i luma, ua matagofie Savaii ma o tatou nuu i tua.

Faafetai i le Ofisa Sili o Pulega ma le Matagaluega i lo outou galulue malosi, le faalogologotiga i le faiga o tatou aoga. O lo o faafogofa mai foi Pule Aoga ma faiaoga, o lau tala lava lea e fai atu i tatou fono e fai soo, e le taulia le Minisita. O le tagata e aupito taua i totolu o le potu aoga, o le tamaiti aoga lena tou te faafesagai. E le taulia le Ofisa Sili o Pulega, o le tagata lea e i totolu. Ia faataua ona ave lea i ai o le tou tautua lelei. Ua uma, o la e foi ua matalatala mea o fesootaiga, ua fai emails a aoga uma, aemaise lava Pule Aoga. O telefoni vavave, o le taimi lava e momia ai se fesoasoani, vili le Pule. Aua le nofoai, e le toe i ai se excuse faapea e a ma a le Matagaluega. O imeli, telefoni, o auala uma ia e vave ona maua atu le fesoasoani.

Lau Afioga i le Fofoga Fetalai, o mataupu ia e toe avatu i ai lau faafetai tele i le Itu ma lea Itu, ia manuia tele lau Afioga faapea le mamalu o le Maota. Soifua.

FOFOGA FETALAI: Malo. Ou te manatu ua taliga e fia logo lenei taeao Magele i lau saunoaga, ma e manatu foi e leai se isi o lenei Maota e auese ai ona e tautala galuega, ma e vaai foi ma le manino i auala faasalalau a le tatou atunu i le tele o polokalame faalauiloa aemaise o polokalame e fuafua mamao a le tatou Matagaluega, malo le fai o le faiva.

E faaluaina le agaga e fai ai lou leo ma fofoga taumomoli o lenei Palemene e momoli atu ai le agaga faafetai i lau Afioga i le Minisita i ou faiva alofilima, lea ua vaai ma le totoa ma laulausasaa i suiga tetele ua tulai mai, e le gata i le faatinoga o faiga faavae, a o lea foi ua agai mai Tulafono e siitia ai le maualuga o le faatauina o i latou o lo o nafa ma le faalauiloaina o le Matagaluega, o faiaoga. Faafetai i lau Afioga i le Minisita i le tofa sailili mamao aemaise le tou uta fetalai ua faatautaia ai nei polokalame sili ona taua, aua o le auga lea o le tatou faamoemoe, o se atunuaoaoina lelei, o se atunu manuia foi lena.

E faaleoina foi le agaga faafetai i le Ofisa Sili o Pulega, Falanaipupu, alo i ou faiva, e leai se iota e alofia ai le momoli o le faamalo e faapena foi alii ma tamaitai faiaoga, e leai se iota o lo outou faiva e maligi fua, ae alo i o outou faiva manaia, ina ia manuia le aotauina o tupulaga fai mai o le tatou atunu.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

E fai ai lou leo ma fofoga taumomoli o si o matou nuu, faafetai o la e ua amata si a matou malae taalo, faafetai tele. Ua faaooina mai le talosaga na tuuina mai e alii ma faipule o Aopo, ia, o lou alu atu e asiasi i le vaiaso na tea nei ua feoai mai masini ua amata ona sua le malae. O le agaga faafetai lena i lau Afioga i le Minista aemaise foi o le Ofisa Sili o Pulega ma i latou o lo o nafa ma le galuega, matou te lagolago atu ma ofo atu le tautua a lenei itumalo e fesoasoani ai mo le tatou Matagaluega.

Ia, ua tatou taunu mai i se tasi o Matagaluega taua, le Matagaluega mo Punaoa Faalenatura ma le Siosiomaga, lau Afioga Faamoetauloa. Tulai mai lau Afioga i le Miinsita o lea ua oo i le taimi e tali ai le tatou Matagaluega. Tulai mai lau Afioga i le Minisita.

Tofa Hon FAAMOETAULOA LEALIAULOTO ULAITINO FAALE TUMAALII (Minisita mo Punaoa Faanatura ma le Siosiomaga): Lau Afioga i le Fofoga Fetalai, ua ou tulai atu ma le faaaloalo e molimoli atu ni motugaafa e tali fuaitau atu ai i finagalo faaalia o sui usufono uma o le Palemene sa saunoa mai ai i Matagaluega ma Faalapotopotoga Tumaoti o lo o i lalo o lau vaavaaiga. Ae ou te le i oo atu i lea itu, e ao lava ona ou faaleoina le agaga faafetai ma le faamalo i lau Afioga i le Fofoga Fetalai mo le faatautaiga o le Fono usu a Samoa. E ui lava ina tetele i pesega o sui usufono uma ma lo latou maemaea e faaui atu i le Nofoa, ae matauina pea le mau o le toovae i lou faapalepale, ou te momoli atu ai le faamalo i lau Afioga.

Ou te momoli atu foi le faamalo i lena Itu o le Maota i le afio o lau Afioga i le Taitai ma le Sui Taitai o le Itu Agai ma sui usufono uma o lena Itu. E faapea foi lenei Itu i le afio o lau Afioga i le Palemia faapea Minisita o le Kapaneta aemaise o Minisita Lagolago, faamalo le fai o le faiva.

O paia ma sa o Samoa o le a taoto a o se alaoo, ae ou te fia asiiasi atu ma faatalofa atu i lou itumalo o Gagaemauga Nu. 3, le paia o Aiga Sa Peseta, Afio le Nofo Matua ia Suisala, Afio le Maveve, Afio Lilo, Susu le Maopu ia Leota, mamalu mai Leusoalii, faapea le Faleiva ma upu ia te oe Matautu, o Oe o le Faamalumaluga o Malo, o Oe o le Muaautasi o Puleono i Salafai. Ua paia foi Saletoalepai o lo o afio ai Maiava ma Susu ai Mataia, alaalatai Mauigoa o le Aitutagata ae a le lavelave o Satoalepai.

E le faagaloina foi le Aiga Sa Levi i Auauna Paia a le Atua i fata faitaulaga e fia o lo o tatalo i le po ma le ao aua se manuia o lo ta Itumalo mo le lumanai .Ia ae tapuai maia ae sei alo ane lo outou sui usufono e ave so tatou sao i mataupu e pei ona laga e sui usufono o le Fonousu a Samoa e agai mai i le Matagaluega ma Faalapotopotoga o lo o i lalo o lau vaavaaiga.

O lea ua opea i le Maota lafoga a sui usufono o le Fonousu a Samoa, ua uma foi ona tuumataga ma tuu vaega mataupu uma, issues sa agai mai ai lafoga a sui usufono o le Fono usu a Samoa i Matagaluega ma Faalapotopotoga o i lalo o lau vaavaaiga, ma o le a ou tali atu i ai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le fatauga faalua

Lau Afioga i le Fofoga Fetalai, o le mataupu muamua lava o totogi o tagata faigaluega. O le Tulafono Tau Faaofi o le Faatatauina o Tupe 2015/2016 ma lona sootaga i le faatinoina o auauanga a le Faalapotopotoga po o Matagaluega foi. O lo o opea i le Maota le lafoga e faapea, i quote, e 80% o le tupe o le Matagaluega o Punaoa Faanatura ma le Siosiomaga o lo o alu i totogi o tagata faigaluega ae na o le 20% o lo o faagaoioi ai le faatinoina o galuega. O lo o aumai ai foi ma se tuuaiga e faapea, õatonu o le vaega lea e le o mafai ai ona atoatoa le auauanga a i latou ona ua toatele tagata faigaluega ae le o lava resources latou te faatino ai galuega.ö

Lau Afioga i le Fofoga Fetalai, e sese mamao i Sini ia fuainumera e 80% i le poloketi o le Tala o le Tupe 2015/2016 o lo o alu i totogi o tagata faigaluega. O le fuainumera sao lava e 36%, leaga tele le mathematics a lenei sui usufono, e 64% o le paketi o lo o faagaoioi ai galuega ae le 20%.

Lau Afioga i le Fofoga Fetalai, o le tasi lenei o suesuega faasaienisi e faaeteete tele i ai saienitisi suesue, o fuainumera po o results e base ai faaiuga o suesuega aua a sese fuainumera ua sese atoa ma le faaiuga o lo o base i luga o lea fuainumera. E faamalie atu ai e le mafai ona ou tali atu i tuuaiiga uma nei leaga ua sese uma lava, ua sese fuainumera ua sese foi faaiuga e to mai ai i le tulaga lea.

FOFOGA FETALAI: Malie lau Afioga i le Minisita leaga o le mataupu sa laga e le sui usufono, ae se i faasaosao atu fuainumera a le sui usufono.

Afioga Toeolesulusulu Cedric Pose Salesa Schuster: Lau Afioga i le Fofoga Fetalai, o le mea muamua atonu e eseese Tala o le Tupe o lo o silasila ai le Afioga i le Minisita ma le Tala o le Tupe lea ou te vaavaai i ai.

Na o le tasi lea o lou tulai atu ona ou faamaui lea i tua ae saunoa le Afioga i le Minisita. O le paketi o lo o i ai, o le aofaiga laitiiti i galuega faatino a le Matagaluega e \$10milliona, mai le \$10milliona e \$8milliona e alu i totogi o tagata faigaluega o le output 1 e oo i le 11, o le vaega lea ou te tau matau atu ua ave e le Afioga i le Minisita o isi tupe faaalu e aofia ai le totogiina o fees ma Faalapotopotoga nei e auai tatou lea e atoa ai le \$25, atonu o le vaega lea ua feesesearai ai ona o lea ua lau ai e lana Afioga cost i fao.

O lea ou te talanoa atu i expenses lava nei e faaaoga i le \$10milliona lea e alu i le Matagaluega. E le o se tuuaiga faapea o faaleaga i le aufaigaluega. Lau Afioga i le Fofoga Fetalai, o le tuualalo na avatu e ao ona toe silasila i ai, e le na o le pau lea o le Matagaluega, lea foi na avatu nisi o Matagaluega. A tagai foi i ai i le tele o Matagaluega uma e pei ona ou fai atu o le va o le 30% i le 80% o lo o faaalu i totogi o tagata faigaluega. O le atugaluga ma le tuualalo ina ia mafai ona toe silasila i ai mo le agai i luma ina ia lava se seleni e faatino ai galuega, ona pau lea o le soso atu lau Afioga i le Fofoga Fetalai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Tofa Hon FAAMOETAULOA LEALAI AULOTO ULAITINO FAALE TUMAALII: Faafetai i le sui usufono, o le Tala lea o le Tupe e faigofie lava, a faaopoopo uma lava items o lo o alu i le totogiina o tagata faigaluega, aveese i le total le tupe lea e ave i le SROS, aua o lea e sau i i e le o talia i i, ona vaevae lea e faigofie lava ona maua ai lea o fuanumera ia e avatu. A e vaai i le tulaga o paketi aí ou te le iloa pe na vaai le sui usufono i paketi o totogi a isi Matagaluega lea na ou galue ai e tutusa lava le tulaga o fuainumera e consistent right through. O le mea lena ou te fai atu ai e sese le fuainumera lea na te aumaia, ma lou faaaloalo lava.

Tofa Levaopolo Talatonu: Lau Afioga i le Fofoga Fetalai, e le tuuaia se isi i le tulaga lea e te lua argue ai nei i fuanumera. E pei o le mea lea na avatu ai le atugaluga muamua e le i toe aumaia se faasaoga o fuainumera sese nei e te lua o sese faatasai ai. E pei o le mea lena, o lea e le i oo mai se faasaoga o numera sese lea e i totonu o le tatou budget.

FOFOGA FETALAI: E lei afea i le saunoaga a le sui usufono le mataupu lea ae agai pea e tali.

Tofa Hon FAAMOETAULOA LEALAI AULOTO ULAITINO FAALE TUMAALII: Faafetai lava i lau Afioga i le Fofoga Fetalai, ou te le tali atu foi i le sui usufono lea aua foi e lei lauga ai.

Afioga Toeolesulusulu Cedric Pose Salesa Schuster: Na ona ou toe soso atu lava lau Afioga i le fofoga Fetalai, ina ia malamalama lelei e \$10 miliona le budget ua faataatia mo galuega fai a le SROS.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faalavelave lea o lea ua tuu le au ae maa i aau. O lea ua amata ona talanoa i le auiliilina o le budget e le i oo i ai. Ua uma foi ona saunoa le Taitaifono o le Komiti o Tupe Maua ma Tupe Totogi, e i ai nai vaega ua uma ona faia i ai a latou Teuteuga. E pei o le tulaga lena ona o lea o le a tuu le mataupu a o le a auiliili le budget, pe agai loa tatou e auiliili?

FOFOGA FETALAI: Tulai mai le Taitaifono o le Komiti o Tupe Maua ma Tupe Totogi. Malie lava lau Afioga i le Minisita.

Susuga Hon Papaliitele Niko Lee Hang: Lau Afioga i le Fofoga Fetalai, ma le faaaloalo lava, na o sina fesoasoani atu i le mataupu i pasene lea e finau ai le aualii lea. Na omiomi atu nei lava lau calculator e 31% personnel o le total budget a le Matagaluega. E 31% le aofaiga o le vaegatupe o le paketi a le Matagaluega o lo o alu i totogi o tagata faigaluega, ma lou faaaloalo lava.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: O le a le faafinauina foi lea itu e manatu ua malamalama, malilie foi sui usufono mamalu o le Tali a le Malo ou te manatu ia tatou logosaia o le tali lava lena a o nisi mea uma, sei tatou agai i le iloiloga aulilili ona faamalamalama atili lea. Tulai mai lau Afioga i le Minisita.

Tofa Hon FAAMOETAULOA LEALIAULOTO ULAITINO FAALE TUMAAALII: Faafetai i lau Afioga i le Fofoga Fetalai. Ou te faamanatu atu, e le faapea na o resources nei e aumai i totolu o le budget o lo o faafagaluega ai tagata faigaluega o le Matagaluega. O lo o tele poloketi o lo o faatupeina mai a tatou paaga atinae, development partners faava o Malo o lo o galulue ai. E leai se utiuti o galuega o lo o faaaoga ai le tomai o tagata faigaluega.

Lau Afioga i le Fofoga Fetalai, ua taatia i paga le lafoga e faapea e 1½ miliona o le 8 miliona mo totogi o tagata, o lo o faaalu i le totogiina o le Ofisa Sili o Pulega ma Pule Sili Lagolago. O lo o sau ai foi ma se manatu e faapea, ua tele le Matagaluega o Punaoa Faalenatura ma le Siosiomaga ma ua top heavy foi, e vaivai tele lenei manatu. O le mea moni lava lau Afioga i le Fofoga Fetalai, o divisions uma a lenei Matagaluega, o fuafuaga alualu mamao lea a le Malo ina ia ogatasi ma feagaiga faava o Malo o lo o avea ai Samoa ma paaga, International Convention, e puipuia ai ma faasao le siosiomaga ma punaoa faalenatura, ma puipuia mai foi i faalavelave faafuasei ma mala faalenatura mai le suiga o le tau o lo o tatou i ai nei. O ia vaega uma mo se faataitaiga o le vaomatua ma le suavai, e tatau lava ona i ai i lalo o le faamalu o le Matagaluega o Punaoa Faalenatura aua o vaega uma ia o lo o sili ona lamatia i le suiga o le tau, climate change.

Lau Afioga i le Fofoga Fetalai o le isi itu, o vaega uma ia o lo o tele ai poloketi o lo o manuia ai Samoa i tupe o lo o aumai mai fafo i totolu o le atunuui ..

Afioga Toeolesulusulu Cedric Pose Salesa Schuster: Faafetai lava i lau Afioga i le Fofoga Fetalai mo le avanoa. E faamalie atu foi i le Minisita ona e faapea e sese lafoga na tuuina atu, e le o le agaga lea a o le naunautaiga lava ina ia tatou galulue faatasi aua le manuia o Samoa. Ae na ona ou toe soso atu i le tulaga lea, i le matau atu e 14 ACEOs a le Matagaluega e silia ma le \$80,000+ le totogi o le ACEO e toatasi a tuufaatasi e silia ma le \$1 miliona, a faaopoopo i ai ma le CEO e \$100,000, o le mea lena e avatu ai se ata fuafua pe \$1,250,000 le tupe faaalu. E le o se agaga o se isi vaega, e le o i ai foi se agaga faapea e top heavy, e leai, atonu afai na maitau mai na fai atu se top heavy, o le vaega na avatu ai ina iaí ..ou te malamalama foi i le tele o galuega ma le tele o divisions i totolu o le Matagaluega. E pau lea o le vaega e avatu ai le fesoasoani lau Afioga i le Fofoga Fetalai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: Malo. O lea ua maua. Ia tulai mai lau Afioga i le Minisita e faauau le saunoaga.

Tofa Hon FAAMOETAULOA LEALIAULOTO ULAITINO FAALE TUMAALII: Faafetai i le sui usufono mamalu, o le tulaga leaí .na saunoa le sui usufono mamalu o lo o tele lava ia poloketi o lo o faamanuiaina ai le Matagaluega lenei mai paaga i fafo, ma e moni lea saunoaga. O le upu moni lava, o le fua na o le lelei o le faatautaia o galuega a le Matagaluega, o lo o lelei mea uma ma o lo o lelei foi le Organisation Chart o lo o i ai i le taimi nei.

Lau Afioga i le Fofoga Fetalai, ona ou see mai lea i le Faalapotopotoga o le Suesuega Faasaienisi i Samoa, SROS. O lo o i ai se lafoga e faapea e 50% o le Paketi tausaga faaletupe 2015/2016 o le totogi o le aufaigaluega, e sese foi lea fuainumera. O le fuainumera sao lava e 44%, ma o lea la o le a ou fai atu, o le SROS po o le Faalapotopotoga o Suesuega Faasaienisi a Samoa, e faakonekarate uma avanoa faigaluega, e amata mai lava i le ofisa Senior Research Scientist, Principal Research Scientist, Assistant ACEO o Saientitisi uma ia ma le CEO. O le fesili la, o le a le mafuaaga ua ese mai ai le fausaga o le SROS ma isi Matagaluega a le Malo faapea foi isi Faalapotopotoga Tumaoti a le Malo? O le tali, e manaomia e le SROS ni faiai maamaai, sei tulou, sogasoga, fiafia i le luitau i le suesue faasaienisi i mea fou mo le atinae o le atunu. O le SROS foi o lo o tele poloketi o lo o fund mai fafoí ..

Afioga Toeolesulusulu Cedric Pose Salesa Schuster: Lau Afioga i le Fofoga Fetalai e toe tasi lava lea.

FOFOGA FETALAI: Ia, malie lau Afioga i le Minisita, se i tulai mai le faauilavea.

Afioga Toeolesulusulu Cedric Pose Salesa Schuster: E leai, e le o séi ...lau Afioga i le Minisita, faapea ua ou taupepeloina ia le Matagaluega po o le Pulega foi. E talitonu le agaga e taua le vaega o lo o saunoa i ai le Afioga i le Minisita i le maualuga o le tulaga e tatau ona i ai latou e feagai ma lenei vaega ona o le malamalamama faasaienisi mo suesuega. Na ona ou toe fesoasoani atu foi i le Afioga i le Minisita, ia o lea foi e i ai i le itulau e 326 ma le 327, ia e \$1.6 miliona le tupe e faaaluina i totogi o tagata faigaluega, ae \$3,119,000 ia le totogi, ia e faitau ane i ina, faafetai.

FOFOGA FETALAI: E manaia le tuu pea se i usi le faamalamalamaga a le Minisita, e le mafai ona tatou alu pea ma toalia le tatou Fono, o lea ou te maitau atu lava e le i oo le Minisita i le ooooga o le faamalamalamaga. Le Taitai o le Itu Agai?

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon Palusalue Faapo II: Ioe, mo le silafia e le Maota aemaise lau Afioga i le Minisita, o le Afioga i le sui usufono mo Aana Alofi Nu. 3 o le Minisita Agai o le Siosiomaga, o lea ua olo lava le fua i le vaega nei ona o lau fautuaga i Minisita Agai, ia mautinoa suesue aulilili ia paketi a lau Matagaluega. O lea laí e leai la e le o ni mea sese ma ni a, o le Minisita Agai lea sa faafeagai lava ma lau Paketi lau Afioga i le Minisita. Ia o le faamalamalamaga lea.

FOFOGA FETALAI: O lea ou te maua, o lea ua tali le Minisita i mea uma sa saunoa i ai le Minisita Agai, ae ua atili ai ona sese le Minisita Agai i lou fai ma e tulai mai.

Ia tulai mai lau Afioga i le Minisita mo Punaoa Faanatura ma le Siosiomaga.

Tofa Hon FAAMOETAULOA LEALIAULOTO ULAITINO FAALE TUMAALII: Faafetai i lau Afioga, leai e sili le fesoasoani pea o le Taitai i le sui usufono mamalu. O le Budget lea ou te study ai foi, a lea e maka uma ia le personnel lea e i ai uma lava le personnel lea e vaevae i le 33,480 maua ia fuainumera ia ou te fai atu ai ó ma o lea e ogatasi lava ma isi foi Faalapotopotoga Tumaoti a le Malo. O le mea lena o lea e fai atu ai, e faamalie atu i le sui usufono pe afai ua tetele atu i lena itu. E tele la poloketi e leai la se laitiiti po o se utiuti o galuega o lo o faigaluega ai le aufaigaluega i a latou suesuega.

Ona ou oo mai lea lau Afioga i le Fofoga Fetalai i malosiaga faafouina, aua e i ai foi malosiaga faafouina a le poloketi ia i lalo o le vaaiga a le Matagaluega o Galuega, Felauaiga ma Atinae Eseese. E i ai foi ia poloketi ia e tele o lo o i lalo o le Matagaluega nei, le Matagaluega o Punaoa Faalenatura ma le Siosiomaga. O lea na fesili po o fai se Energy Audit o fale o le Malo ina ia faaaoga ai energy efficiency appliances e faaitiitia ai le maintenance cost o fale o le Malo? O lea ou te tali atu, ioe, ua leva ona fai e le Malo, e tele naua ia poloketi ia e fai e le Malo e auala atu i le Matagaluega o Punaoa Faalenatura ma le Siosiomaga, o lo o audit ai ia electrical appliances lea ina ia sefe ai le energy. O lea o le a ou tau atua, o le isi poloketi, o le Poloketi e lima ia atunu o le Pasefika lea e trial ai e i ai la Samoa, o le PEEP 1 ma le PEEP 2, o le Promoting Energy Efficiency in Pacific. Ua uma la le Phase 1, e funded uma lava e le UNDP, a o lea ua oo i le Phase 2, o lo o vaai foi la i le tulaga lea. E le gata i lea, o lo o i ai foi ia le poloketi lea o le Technical Assistance Addressing Climate Change, po o le TAACC, o lo o faatupe e le Malo tele o Saina. Ma o ia poloketi uma, o lea ua uma le Phase 1 o lea ua fai le Phase 2, o lea uaí aua sa faaaoga ia Air Con foi ia o lo o i ai ia mea e leai ni kasa oona e pollute le atmosphere, ae e le gata i lena, e laitiiti le eletise e operate ai, tasi lena. O lea la i le vaiaso na tea atu nei, na taunu mai ai ia le Shipment lona lua o le Phase 2 o lo o aumai ai le 2,500 o LED Street Lights, o street lights ia e faaaoga pea le grid e feed mai ai ae laitiiti la le eletise e faaaoga ai, but its more brighter than the other street lights.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O lo o aumai ai foi ma solar street lights, aisea? Ona o le tulaga ina ia faaitiitia le kasa oona lea e luai atu i le atmosphere, se i tulou, ia ma faaitiitia ai foi ia le cost. O lona uiga la, o i ina lea e maua mai ai le savings a Matagaluega ia o lea e participate ia po o Faalapotopotoga Tumaoti foi i totonu o le Poloketi.

Ona ou oo mai lea i Taligalu ma Talivai. Ou te muamua ona ou faatepa le mamalu o le Fonotaga lenei i le Poloketi lea e tau o le PPCR po o le Pilot Project on Climate Resilience o le Poloketi lea o lo o fund i lalo e le World Bank ó ma o le focal point o le Matagaluega o Tupe, ae o le faatinoina o le galuega o lo o i lalo lea o le Punaoa Faanatura, ma o le Poloketi lenei e base i luga o communities o itumalo. Ua uma foi la ona piki ia le Project Management Unit ia ma ua oo nei i le taimi e review ai ia Plans o Coastal Infrastructure Management Plans, o le mea lena o lea e i ai nei. E i ai sui usufono na latou laga mai a latou taligalu e faapea, po o le a le mea ua tuai ai ona fai? Ia tailo foi i ai i lo outou maemaea ma lou foi maemaea i le aufaigaluega, e masani lava ona ou valaaua ma omai i totonu o lou ofisa ma ou fai atu, o le a ea le hold up, o le a ea le hold up foi lele? O le faamalamalamaga lava lea e aumai ia te au faapea, e i ai ia procedural requirements foi lea, aemaise lava le poloketi ia e fund i lalo o le World Bank, e tatau lava ona faamalieina ae le i faatinoina ia le poloketi. O lau fesili i ai, e le mafai ona cut off ia na red tapes ae alu sao loa i le implementation? Ae fai mai e leai. O lea la, o lau fautuaga na ave i ai i le Matagaluega, o lea e faafogafoga mai, ia tautuana ma latou ia involve ia sui usufono o itumalo taitasi i le talanoaina o mea e ave i ai le faamuamua i le faatinoina i lalo o le poloketi lea, o lea la ou te faamalulu atu ai i nisi o sui usufono. Tusa, se i tulou, ua ou tapa fua i le suafa, i Matautu sa ou siakia, ia o lo o i ai lava i le priority list ae ona o tulaga faapea, ae talosia ia ia faatino ae le i uma lenei Paeaiga, ia a leai foi, ia ou te iloa e fai lava ae manatua pea oe, o oe lea na e laga ia le poloketi lea i se isi foi Paeaiga atu i luma. Aua e te popole e te toe sau lava. E faapena foi Lalomanu ma le tele lava of ..o lea ou te tatalo atu ai, o sui usufono uma lava o lea na aumai talosaga, se i siaki ifo po o fea le funding lea e i ai ia lau poloketi, o le lava na apalai mai ma talosaga mai, e i ai lava le funding o projects le donor o lea e streamline ai ia poloketi ia.

Ona ou oo mai lea i Vaisigano, o lea na saunoa foi lou uso a Minisita i le Matagaluega o Atinae Eseese, o le Poloketi lea, o lea ua galulue nei le kamupani lea o le Krama Company i le tusiga o ata o le Vaisigano, ma e o lo o galulue i models eseese foi lele flooding model, ina ia ogatasi ia le wall o le talivai ia ma le maualuluga foi o auala laupapa ia e i ai ó ma le tulaga foi lele, ina ia aua nei overflow le sau o le vai mai uta e sau agai i tai, ma o lea la sa ou siakia. Afai lava e gasolosolo lelei pea pei o le mea o lo o i ai nei, o lo o fuafua o Setema e amata ai le galuega lea o le tausaga nei, o le tulaga lena o le lipoti ua oo mai ia te au.

Lau Afioga i le Fofoga Fetalai ona ou oo mai lea i le faaleleia o fale o le Maloí ..

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

FOFOGA FETALAI: Malie lava lau Afioga, se i tuu atu le avanoa i le Afioga i le sui usufono mo Falealupo.

Afioga Hon Aeau Peniamina Leavaiseeta (Falealupo): Faafetai mo le avanoa, faamolemole lava lau Afioga, manaia lau lisi, o i ai le igoa o Falealupo i lau lisi lena o a tatou atinae taua lava na, leaga e aafia e maualalo? Faafetai lava.

FOFOGA FETALAI: Ia tulai mai.

Tofa Hon FAAMOETAULOA LEALIAULOTO ULAITINO FAALE TUMAALII: Lau Afioga i le sui usufono mamalu, o la e i ai.

Afioga Hon Aeau Peniamina Leavaiseeta: Faafetai, ia manuia.

FOFOGA FETALAI: A manino lava le mata o le vai, ua toa foi le tai.

Tofa Hon. FAAMOETAULOA LEALIAULOTO ULAITINO FAALE TUMAALII: Lau Afioga i le Fofoga Fetalai, ona ou oo mai lea i le faaleleia o fale o le Malo lea na taua le Samoa Post lena e iai i totonu o le Tala o le Tupe le \$150,000 lena e i ai, lena e faafou ai le fogafale i luga o le fale lea o le Malo, ma o lo o galulue ai foi lava. O lo o lelei lava le fale o le Matagaluega lea o lo o i ai lou ofisa i Tamaligi. O le faamalamalamaga lena o le vaega e pei ona fesili ai se isi o sui usufono mamalu.

O le tulaga lea na aumai e se tasi foi o sui usufono mamalu e faapea e tatau ona fesoasoani i le paketi se i iai se lafoga e tatau ona totogi i fanua faatau o le Malo. E ia te au le ava ou te faapea atu ai, o lo o i ai le stamp duty o lo o pay i le MOF pe a faatau atu se fanua, ma o lo o i ai foi le formular e fuafua i ai lea stamp duty i le tau o le stamp duty lea i le value o le property. O lea la o lo o i ai le tulaga lena i totonu o le Matagaluega.

O le isi mataupu na laga mai, o le faalapisi ma le lafoai o lapisi. O le atunuun lenei o tatou, o le atunuun faigata tele, e tiga lava le i ai o rubbish bins i le taulaga atoa, a le o atu faaleaga, gaoi, se i tulou, lapisi uga, ae le gata i lena, o le faaotaota ia. O lo o i ai le Tulafono o le Waster Management Act 2010 e mafai ai ona molia se tagata e faalapisi i totonu o Samoa, ma o le tulaga tonu lava lena e i ai. E fua foi la le faasalaga i le tuga o le solitulafono ma le aafiaga e i ai le siosiomaga, lea e i ai nai vaega ia na o dump le lapisi mo poisons foi lea i Malololelei ma pue le ata ma aumai, na o lava le Matagaluega i le tulaga lea ma ave e toe kilia mai lena vaega. E pei la o le tulaga lena.

Sa fesili foi se tasi o sui usufono mamalu i le tulaga o le fanua i Salelologa, lea e i ai le uafu ona o le faalavelave i le tulaga o le uafu lea i Salelologa. Ma o lo o galulue ai nei le Matagaluega i le fuaina o le fanua.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O le itu i sisifo o le eleele o le Malo, a o le itu i sasae o le fanua faaleaganuu lea, ma o lea la ua ave iai lau faatonuga i le Matagaluega, e fua mai le fanua ae ave e le Malo le fanua lea ina ia vave ona atinae le uafu i Salelologa pei ona fuafuaina.

E i ai foi nisi lafoga sa faapea mai po o le a le mea e le tuufaatasai ai eleele, eleele o le Malo, eleele faaleaganuu, o eleele umia saoloto i lalo o se authority e tasi. O lo o i ai lava le fuafuaga a le Malo i lena tulaga, atonu foi mo le agai i luma, ona fai lea o se Matagaluega o Eleele ma Atinae e tuu uma ai nei aseta a le Malo i le tulaga o le agai i luma.

Sa fesili foi se tasi i le tulaga o car park i le malumalu lea e i Taufusi. Sa ou fesili i le Matagaluega e aumai se lipoti, ma o le faaaliga na aumai ia te au, o lo o i ai le car park i tua o le falesa o lo o ui mai i le wholesale a Amau ma le falepau foi lea i le tulaga lena. O lo o iai la le car park.

Ona ou oo mai lea i le water testing, lea sa saunoa ai foi le sui usufono mo Falelatai ma Samatau e faapea na pau lea o le organization accredit authority for testing. E sao, ou te iloa lava e le tatau ona fai e le Matagaluega o le Soifua Maloloina po o se isi lava Matagaluega o lo o faia le supply o le mea lea, aua it&s a conflict of interest, aemaisae lava pe a i ai ni litigation cases foi nei, ia o le SROS la e faamoeemoe i ai, aua o le accredit authority lea e mafai ona latou testifying ina ni ituaiga results faapea mo le agai i luma. Iaí ..

FOFOGA FETALAI: Malie lava lau Afioga i le Minisita, se i avatu le avanoa i le faauilavea a le sui usufono. Tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, faafetai i le Afioga i le Minisita ua tele ma anoanoai nei galuega, leaga o le Afioga i le Minisita o lea na te vaia le laueele, o le sami ma le ea. O mea lea tatou te ola ai i aso uma, o le tamaloa lea, o le Minisita lea, o le Saientisi. Sa ou fautua ia Toeolesulusulu, na pau lava lea o le tagata ua paga ma le toeaina. A o le mea tonu lava lea ua oo i ai, sa ou ttau i lau lauga i le test ina o vai ma meataumafa E sao lelei le Afioga i le Minisita, talu ai ona e le o i lalo o le mandate a lau Matagaluega le SROS. O lea ua matou vaai i mea e faatino ai galuega i totonu o le SROS, ua tatau ona le gata i le vai, a ia faataua lava meaai nei mai fafo. O i lea e tele faafitauli lea ua i ai, ia matua tuu i le mandate, so o se meaai lava e aumai fafo e import mai fafo, e tatau ona ave e test mai le SROS. O lea ua tatou vaai i le eleni, o le pisupo, o nei mea, o mea e matua le talafeagai, e tatau ona ave uma e test mai gauta se i tatou vaai i ai, o mea na o lea e sili ona mamai ai o tatou tagata. Ma le faaaloalo lava. Faafetai.

FOFOGA FETALAI: Ia, tulai maia lau Afioga i le Minisita e faaauau le saunoaga.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Tofa Hon. FAAMOETAULOA LEALAI AULOTO ULAITINO FAALE TUMAALII: Faafetai i le sui usufono mamalu mo le faauilavea. Ona ou oo mai loa lea i le Lipoti lea a le Komiti o Tupe Maua ma Tupe Totogi, i lalo o le MNRE, lea e aumai ai le recommendation lea faapea o le second recommendation, recommend the Ministry comply with legislation, legislations regarding the submission of Annual Reports to Parliament, due to its noted non compliance. E fia fesoasoani atu, o lea ua up to date uma Annual Reports a le Matagaluega, toe tasi lava le Lipoti lea e alu nei i le edit stage ona meet uma lava lea o requirements lea. E faafetaia ai foi le Matagaluega i le tulaga o le latou auaunaga. Ia, o ou tiute na faa-Minisita, a o lea o le a avatu sauí .

FOFOGA FETALAI: Malie lau Afioga i le Minisita, se i avatu le avanoa i le faauilavea a le Taitaifono o le Komiti o Tupe Maua ma Tupe Totogi.

Susuga Hon Papaliitele Niko Lee Hang: Lau Afioga i le Fofoga Fetalai, faafetai i lau Afioga. Ma lou faaaloalo, ona o lea ua taua le fautuaga a le matou Komiti ona o mea ia o Lipoti. E saolele le saunoaga a le Afioga Minisita o la e ua tapena, a o le tulaga lea matou te fautua atu ai, ina ia faatino le galuega lea i lalo o le Tulafono. O le ala lena o le toe faamanatu o Lipoti ia, ona o le tele o Matagaluega na ona tapena ae le o aumaia i le taimi faatulafonoina ina ia uma ona sue tusi a Matagaluega ona tuuina mai lea i totonus o le Palemene. O le tulaga lea ma lou faaaloalo lava.

FOFOGA FETALAI: Malo faafetai i lau Afioga i le Taitaifono. Ia, se i tulai mai lau Afioga i le Minisita e faaiu mai le saunoaga.

Tofa Hon. FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoag Fetalai, o le tulaga lena ua avatu ai le recommendation lona lua lea leaga e faauigalua le tulaga ma e afaina ai le Matagaluega ma lana performance. E pei la o le mea lena o lea e avatu ai foi e faatepa i ai le Fonotaga ae faafetai i le Taitaifono mo lana folasaga malamalamala.

Ia, ona faaiu mai ai lea i lou tulaga faa-sui usufono o Savaii. E tatau lava ona avatu foi se tulagá. Ou te lagolagoina lava lau Afioga le tulaga lea ia fai se loan tele lava e fai ai tatou atinae. O lea ua ou tautala faa-sui usufono. Ia fau se auala laupapa mo Savaii e alu atu i Manono Uta, Manono Tai, Apolima, o le motu lea i le va o Apolima ma le peninsula i Salelologa. A vaai i ai le alignment o motu na, e laina faatasi uma, ma e fai la ona fai ai ni pou i ina e alu atu ai se auala laupapa, ma ou te fai atu o le matua tele o le tupe e maua aua e omai tagata tafafao maimoa mai fafo, manao e rent taavale, na o le taamilo lava ia Samoa atoa, omai toe o i fafo, ae sasaa i i le oa i totonus o le mea lea.

O lea la e talosaga atu aií ..

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Tofa Levaopolu Talatonu: Lau Afioga i le Fofoga Fatalai, o se mea e fia malamalamai ai i le saunoaga a le sui usufono, o lea ua saunoa faa-sui usufono. Leai na o lou fia fesili lava po o se auala laupapa po o se auala sima lena e te talanoa mai ai, aua e malepe le auala laupapa lena e te talanoa mai ai.

FOFOGA FETALAI: O le mea lava e tasi.

Tofa Hon. FAAMOETAULOA LEALIAULOTO ULAITINO FAALE TUMAALII: E malepe pe a leaga inisinia. Ae a lelei inisinia e leai lava ma se faaletonu. Sa ou travel i le auala laupapa e alu i totonu o le sami loloto i Saina e 350 kilomita le umi o le auala laupapa. O le manaia ia o leí .

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fatalai, se o le lalolagi lenei e leai lava se mea e taofia ai le miti a le tagata ia, afai foi ae faauumi i luga i le lagi mea o uamea e mafai foi ona tatau i maea. Na pau lava le mea, tatau mai le maea i Mulifanua a tuai le taavale na ona aapa atu lava i le maea e suigi atu lava i i e oo i Savaii.

FOFOGA FETALAI: Leulumoega, e i ai se isi au ata manaia?

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioaga ma Agafesootai): Faafetai lava i lau Afioga i le Fofoga Fatalai. Manaia lava le saunoaga a le sui usufono mo Gagaemauga Nu.3, ua aveese lona pulou faa-Minisita. A o le mea lea e popole i ai, o le a aliali uma lava le manifesto a le Tautua aua o lea e fesoottai le Minisita ma le Minisita Lagolago ma le ulupoo alu ane loa i le Taitai. Se i tagai la i le connection o lea e i ai? O le mea lea e i ai, o le a aliali uma lava mea uma a le Tautua. O lena foi ua outou faafogfa i ai o le auala laupapa, a ua uma foi le isi mea i le aso ananafi. Ma le faaaloalo lau Afioga.

Afioga Hon Faumuina Tiatia Faaolatane Liuga: Lau Afioga i le Fofoga Fatalai, o le isi option lea e i ai, aua o lea o le a aumai masini e fai ai le tunnel lea e alu atu i Falefa agai i Fagaloa. O le isi la option lena i Savaii, e alu atu lava le tunnel lea alu atu i lalo, ae ae i Manono, alu atu lea ae ae i Apolima, alu atu lea alu agai i Tafua ona faatoa sau ai lea i Salelologa. Se i vaai i ai i le manaia? E lelei la lena aua foi e oso i lalo, e malupuipuia mai matagi malolosi. Ma lou faaaloalo lava.

FOFOGA FETALAI: Manaia. Aeau e te manao foi e oo i Falealupo le tunnel?

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon Aeau Peniamina Leavaiseeta: Lau Afioga i le Fofoga Fatalai, ou te tulai atu e faaluaina le lafo a le Afioga i le Minisita i le auala laupapa lea. Ae pau lava le mea lea ou te faitioina ai le Minisita, e le taunuu lau miti pe a e i ina, leaga e manao e fai muamua mea la e i o i Aleipata, ae sili lou sau i inei ona faigofie ai lea o le tatou galuega, se i fai le matou auala laupapa lau Afioga i le Fofoga Fatalai. O le sao lea?

FOFOGA FETALAI: E fia faasaoina le saunoaga a lau Afioga i le Minisita, se i tuu atu le avanoa i se tasi o sui usufono mo Falealili, Tofa Tusa Misi Tupuola. Tulai mai le sui usufono.

Tofa Tusa Misi Tupuola (Falealili): Faafetai i lau Afioga i le Fofoga Fatalai. Ou te le tu atu ona o le auala laupapa lea e alu i Savaii, ae ona o lea o le a mei le Afioga i le Minisita i lona tulaga faa-sui usufono o le itumalo, ae ou te tulai atu e momoli atu le agaga faafetai ona o lea ua taua lenei itumalo aemaise foi o le matou nuu sa ou talosaga ai i lau lauga faalauaitele i lau Afioga. Talosia ia ia mafai ona faatino i se taimi o lata mai. Faafetai tele.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fatalai, na pau lava lau fautuaga i le sui usufono mo Savaii o lo o saunoa nei i ana miti, aua e te faalogo ia Aeau, ua lava le ana lea ua tuu mai lava le ana o tagata feoti e tau i o i le lualoto, na o tagata feoti lava ae aua le faia se mea e oti ai tagata feola.

Tofa FAAMOETAULOA LEALIAULOTO ULAITINO FAALE TUMAALII: Faafetai lava i sui usufono mamalu. Ia ona faaiu atu ai lea o se faamatalaga. E momoli atu lau faafetai i sui usufono mamalu uma lava o le Fonousu a Samoa i le tulaga foi o timaiga na aumai i lenei foi sector, tele le sao. O le upu moni lava lena, e toe matimati ai foi ma fuafua fuafuaga a le Matagaluega faapea Faalapotopotoga o lo o i lalo o lau vaavaaiga mo se manuia o Samoa a taeao. Ia manuia tele le Fonousu.

FOFOGA FETALAI: Malo faafetai. E faaleoina le agaga o le talisapaia o tuleiga ma saunoaga e lau Afioga i le Minisita o Punaoa Faalenatura ma le Siosiomaga, ua le masino lenei vaitau ma faafitaui ma luitau ua tatou feagai, ae lagona ma le agaga faafetai le lipoti mai i le tali mai a le Matagaluega. Lau Afioga i le Minisita, ua malo fai o le faiva. E le tau fesiligia le galuega tele o lo o feagai ma lau Afioga i le tau faafoefoeina o le tele o manaoga o sui usufono mamalu, aemaise foi le taumafaiga o le atiaeina o nisi mea fou e ala i le tatou Faalapotopooga o Suesuega. O ou mama na, ia maua pea lou malosi. Matautu, e leai lava se isi muaau malosi, ioe, o oe lava o le muaau malosi o le motu o lo o e feagai ma luitau ma mea uma.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

E ui lava ina faalavelave soo Levaopolo, ae le afaina. A o le agaga ma le faamoemoe, ia alo i ou faiva manaia. E momoli atu foi le faamalo ma le faafetai i le Ofisa Sili o Pulega ma le Matagaluega atoa.

Na ona faamanatu atu lava lau Afioga i le Minisita, se o le vaitaumafa ma le vaitaele o lenei nuu o Sasina, ua leva ona avatu le matou talosaga, o lea e soisoi mai Faumui. O le vaitaimi o Faumui sa avatu ai le talosaga. A sua tutui nei le tai, ona fai sami ai lava lea o le mea. Ae lafo atu i lau Afioga, e oo i le matou fale komiti, o nisi aso e siisii ai le tai ona faasusu lava lea, ae lafo atu, o ou mama na lau Afioga, ua tagisa foi le tatalo atu, ae faigata o lea ou te saofai i le Nofoa, ae ua maua le avanoa, e momoli atu i lau Afioga se i e alofagia le talivai ma le taligalu o Sasina. Ia manuia lou alofaiva.

Ua tatou faasolosolo mai i le Minisita o le Soifua Maloloina. Tulai mai lau Afioga i le Minisit mo le Soifua Maloloina, o lea ua avanoa le Maota mo le tali a le tatou Matagaluega.

Afioga Hon TUITAMA TALALELEI TUITAMA (Minisita mo le Soifua Maloloina): Mamalu pea ia le aitu i le aoa i le afio o lau Afioga i le Fofoga Fetalai, ee foi i mauga o ao le afio o lau Afioga i le Palemia ma le Kabeneta faapea foi Minisita Lagolago. I le la foi itu i le ee papaaao o le Taitai o le Itu Agai faapea le mamalu o sui usufono o le Itu Agai. Afifio foi Ofisa Sili o Pulega ae tainane foi le mamalu o le Failautusi ma le Matagaluega o le Fono. O le aofia lea o paia faatafafafa o lenei Maota ia faataalolo ia, ae se i ou faatalofa atu isi ou itumalo ma le tapuaiga i lenei foi aso ma lenei foi Fonotaga.

Le paia i le afifio o Aiga e Tolu, faapea foi Alo o Tamaalelagi, o Tamaaitu ma le Maugafa, aemaise foi le Faletolu ma Fuaifale. E faapea foi i le la ituvai i le afifio o Aiga Satuala, le Falefitu ma le Fetalai i le Matua ia Tauauvea. Faamalo faafetai i le tapuaiga a le itumalo, aemaise foi o le Aufaigaluega Paia a le Atua o lo o faanonomanu ma faafaleluluia i totonu o lou itumalo i le afio o le Toeaina Faatonu Eti Tamati ma le faletua, e faapea foi le afifio o auauna a le Atua i fatafaitaulaga e fia o lo o faafaleluluia i totonu o lenei itumalo. Faamalo faafetai i talosaga, faafetai mo le tapuaiga aua lou tauaveina o le nofoa o le tatou itumalo. Ia tapuai maia ma le manuia, ae se i ou liliu ane e faatino ou tiute aua le valaauna i le tauaveina o le Matagaluega o le Soifua Maloloina.

Lau Afioga i le Fofoga Fetalai, e tusa ai mai le 32 sui usufono sa saunoa i totonu o le Maota, e 17 na afea le Matagaluega. Mai lena 17, e 9 i latou na saunoa faafetai ma faamalo i le galuega faatino ma lenei foi auaunaga vaivai o lo o tautua ai le tatou atunu e ala i le soifua maloloina.

O lona uiga, e toavalu i latou lea sa faatulai mai fesili e fesiligia ai nisi o vaega o le auaunaga e fia maua i ai se malamalamamaaga, ma o lea o le a ou taumafai e tali atu i ai i le tulaga lautele.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Lau Afioga i le Fofoga Fatalai, e feoloolo nisi o sui usufono sa taua le tulaga faaletonu o le auaunaga e ala lea i le mea lea o le umi ona faatali, tusa pe 3 i le 4 sui usufono sa saunoa i le itu lea ona ou lagona ai lea o se mataupu taua lea. E le pau foi lea o le taimi ua ou faalogo ai i le faasea lea o le umi ona faatali pe a taunuutu atu i le falemai, ma e leai lava se isi vaega o lo o faatalitali ai gasegase ina ia vaai, vagana le Outpatient. Ma e ao ona ou faamalamalamaina e faapea; i futia ua sola ma le tauaveina mai o le galuega i totonu o le tatou maota gasegase i Apia i Motootua lava lea o lo o faasaga i ai faasea nei, sa ave faatasi lava le vaaiga o mai tausavali masani e aofia ai so o se ituaiga gasegase faatasi ai foi ma mai uma foi ia e tuga, aemaise o faalavelave faafuasei, faalavelave e tutupu i gasegase tigaina i le vaega e tasi o le falemai, sa taua lea o le Outpatient po o le vaega lea e vaaai ai gasegase tausavali. Ma o le ala foi lea ina ua maea le falemai fou ona silasila loa lea o le Matagaluega i se auala e foia ai le faafitauli lea, aua o le tele foi o le leo e lagona pea i totonu o le Maota nei faapea foi le lautele o le tatou atunu o lo o agai atu i le falemai, o upu masani lava, o nisi ua faatele o nisi foi ua faatele atili atu, öSe e maliu lava si a matou mai e le i oo mai lava se fomai.ö A le o lena fai mai; öla na ou sau lava i le taeao i le 8, e ta lava le 3 i le afiafi faatoa vaaai lau mai.ö O leo lava na o lea e lagona soo, o le mea tautino lea. Atonu e sao, e i ai foi si faamaoni o ia tuuaiga, ae peitai ane la, e le i tuumamaina e le Pulega ma le taumafaiga a le Soifua Maloloina ma le Matagaluega, sa amata loa ona silasila i se auala e foia ai le faafitauli lea, ona ua oo mai i totonu o le Maota.

I le taimi nei la lau Afioga, ina ua maea le tatou falemai fou, ona manatu loa lea o le Matagaluega, o le a vaaai lua le vaega lea e vaaai ai mai tausavali. Ia tuuese gasegase masani lea e tausavali pea i aso uma, tuuese le vaega e vaaai ai mai lea e mafua mai ona o faalavelave tutupu faafuasei. O lea la ua i ai nei le vaega lautele e taua o le General Outpatient ma le vaega lea e vaaai ai mai faapitoa, o le Accident and Emergencies. Mo le silafia, mo sina faapupulaga atonu e maua ai sina malamalamamaaga i le mafuaaga o lo o faapea ai pea ma tulai mai ai pea le faafitauli lea o lo o lagona pea i totonu o le Maota lenei, o le tatou aufaigaluega o lo o i ai nei, o fomai o lo o faigaluega i totonu o le auaunaga a le soifua maloloina, tusa e 47 fomai o lo o galulue nei, mai lena 47, o lo o i ai ma le toa 10 o fomai tumaoti lea o lo o galulue e lagolago i le galuega o lo o faia i uta i le falemai e fesoasoani ai e le gata i le Outpatient, ae o lo o i ai foi Specialists. O lea o lo o tauave galuega tumaoti o lo o konekarate atu i totonu o le falemai latou te tauaveina nisi o galuega faapitoa o lo o moomia ai lo latou tomai e faaaogaina i totonu o le tatou Matagaluega. Ma o ia la fomai o lo o faigaluega i le falemai, ua vaevaeina i ni vaega e faapitoa i ai le auaunaga. Mo se faataitaiga, o fomai tipitipi, o i latou e vaaia tina maitaga, o i latou e vaaia tamaiti, o i latou e vaaia gasegase foi lea vailaau po o medical clinic po o medical patients lea e faaaoga ai vailaau e togafitia ai.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O vaega eseese faapena o lo o vaevae i ai le aufaigaluega lenei ina ia faatupulaia le tomai i lea vaega ma lea vaega ma lea vaega, e le o toe ave lauteleina, aua o le auala lena e le mafai ona faatupulaia ai se tomai i se ituiga tomai faapitoa. Ma le faamoemoe, e faagasolo foi latou i fafo e aoaoina atili ina ia saga faaleleia atili ai pea le latou auaunaga i lea vaega ua galalue ai.

Lau Afioga, o le tasi lea vaaiga o lea foi e lagona, ona a vaaia la totonu faapea o la e ua pisi le Outpatient ia i latou nei e faatalitali ae o la e feoai mai isi fomai, ona ave foi lea o le tala, ðSole, tiga ona vaai mai o la e ua tumutumu atu le Outpatient ae o la e feoai mai lava isi fomai. ðE leai, e ese le latou tofiga, ua uma na vaevae latou matafaioi e galulue ai. Ma o le mea foi lena e tatau ona malamalamama i ai le atunu i le vaevaega lea ne i faapea o la e tafafao mai lava isi fomai ae o la e pisi atu lava isi fomai. O le mafuaaga lena, e i ai lava vaega ua vaevaeina ina ia malamalamama atili. Ma i le faamalamalamaga atili, i totonu lava ia o le Outpatient, ua vaevaeina i sifi i le ao ma le po ina ia faasoasoa i ai e o lo o faigaluega ai. Ma i le ao, e tusa ma le toa 3 fomai e galulue i le ao mai le 8 i le 4 i le afiafi. E faapena foi i le 4 i le 10 i le po, i totonu o le Outpatient lea. Ae i totonu o le Emergency, e galulue faa 24 itula aua e le iloa le taimi e tupu ai se faalavelave faafuasei, po o se mai tigaina, a o lo o i ai pea lava fomai, ma e i ai lava le fomai e faigaluega Accident and Emergency i so o se taimi. Ma o le faataitaiga, o le agaga lea e faapea mai i le tumutumu, o le aofaiga o gasegase na vaaai, lea ua ou aumaia na o masina e lua ua tuanai e avatu ai sina ata faapulapula i le tulaga o le tatou auaunaga lea, atonu e maua ai sina malamalamaga laitiiti o le Maota nei.

Lau Afioga i le Fofoga Fetalai, o Aperila lava ia, e 9,546 gasegase na vaaia i le Outpatient. O Me, e 9,494. Tusa la o le average, e 9,500 le average o gasegase e vaaia i le masina e tasi.

I le ao lava ia, tusa ma le 144 mai e vaaia ai, ae toatolu fomai e galulue ai, lona uiga e average, e 40 mai i le 50 mai a le fomai e toatas i vaaia i le ao, ona faaitiitia mai lea i le po, lea e tuu ai i lalo tagata faigaluega i le po, i le lua po o le tasi. Ma afai la i le silasila a le Maota i le tulaga lea o lo o i ai le tatou falemai, ona pau o le tulaga ua mafai ona ausia e le aofaiga o le aufaigaluega o lo o faatino le galuega i lenei vaitaimi ó ma e le o se mea fou nei ia le tulai mai o le faafitauli lea o le utiuti o le aufaigaluega, o le mea ua leva, ma o le galuega a le Malo lea na fai ai nei, o le agaga lena e aoao mai, po o le a se faiga e foia ai le shortage po o le tuuitiitia o le aufaigaluega po o fomai. O le ala foi lea, o lea na aumai ai i totonu le OUM o le faamoemoe ia maua ai ni a tatou fomai faaopoopo ni a tatou fomai o lo o aoaoina i Fiti ma Niu Sila ma Ausetalia ma nisi atunu i fafo, o lea ua aveaveai, ma ua avea foi lena ma auala ua tatala ai le avanoa o le tatou Malo se amatalia ai se tatou lava aoga, e aoaoina ai lava a tatou fomai ma faatupulaia ai le numera o tatou fomai, ma o le auala lea ua faatuina ai nei le tatou Aoga Faafomai i totonu o le tatou Iunivesite.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

O le tausaga fou o le a amata loa ona faauu mai a tatou fomai mai i le aoga lea a tatou, ma o le faamoemoe lena afai e toasefulu a tatou fomai pe sili atu e iu mai i le tatou Aoga Faafomai fou lea e i ai i tausaga taitasi, e amata atu i le tausaga fou, o lona uiga, i le isi lima tausaga, ua ova ma le 50 a tatou fomai ua iu mai, ona silia atu ai ma le numera lea e i ai nei le tatou falemai na o le 47 talu mai lava ona ou faigaluega foi au. O le numera lava lea sa sau ai, pe toaitiiti, e le taitai ausia se 100 o ni fomai e galulue i totolu o le falemai aemaise foi o totolu o le tatou atunu. O le vaauga mamao lava lea ma taumafaiga alualu mamao e foia ai faafitauli nei o lo o feagai ma i tatou. Lau Afioga o le tulaga lea o le faapupulaga o le vaega lea sa taua i le itula o fiu e faatali, ia o lena, o le mafuaaga ua folasia atu e silasila i ai le mamalu mo le silafia e lo tatou Maota.

O lona lua, sa taua foi i ni saunoaga ma ni fautuaga lelei sa faatoai mai e ala i saunoaga a sui usufono mamalu e fia maua ni masini, o le a le mea e le matuai aumai ai ni a tatou masini faaneionapo e pei foi o la e fai i fafo, e faaatoatoa ai le auauanaga. Ma o le mea moni lava, e le o se tala sese lea, e faafetai foi ia i latou na laga lea vaega aua o le tulaga foi lea, o lea o lo o silasila i ai lo tatou Malo. Mo le silafia ina ua maea le tatou falemai lea na fai nei, na amata loa ona tatala, aumai faatasi ai ma le tau o masini fou, o lea na outou silasila aua na aumai i le Tala o le Tupe i le taimi na tatala ai le tatou falemai, e \$13 miliona le tupe na faaaluina e aumai ai masini fou e faatotoga ai le tatou falemai o lo o i ai nei. Ae pau le mea e silafia e lau Afioga ma lenei Maota, e le faapea e aumai masini, ia ona galulue lava lea o masini latou, e i ai foi e faatinoa ma faaaogaina masini. E manaomia foi le tomai faapitoa e faaaoga ai masini, aua o nei masini e matua taugata, e matua taugata lava, o nisi foi masini, o la o lo o foai fua mai e o lo o lagolago mai i le tatou Malo ma tatoau taumafaig. O paaga a le soifua maloloina i fafo o lo o aumai ai isi masini e tele ma o lo o faaaogaina nei. Ae ona pau lea o le mea o lea tatou te tilotilo i ai, ne i laaloa le silasila a lenei Maota ma le mamalu o le tatou atunu o lo o fia silafia lea vaega. Mo se faataitaiga, o se masini taugata foi lea e vaai ai totolu o totoga ma tulaga faapena, e le gata i le e faaaogaina le masini o le fomai lea, ia i ai lona tomai faapitoa e faaaoga ai le masini lea, e le gata i le faaaogaina, ae ia iloa foi ia le vaega o lo o manaomia ai ia fesoasoani e ala i le faaaogaina o masini ia mafai ona diagnose i le faaaogaina o le masini lea ia se faafitauli o lo o feagai ma le mai, taatia la le fomai ae tilotilo i le maintenance o le masini, e tatau ona ave foi e aooga faapitoa ia e vaaia le faamamaaina o le masini pe a uma ona faaaoga. E i ai foi techniques po o auala talafeagai e manaomia e sterilize ai le masini, aua e le faapea o masini nei e pei o masini foi ia o lea e faaaogaina e fai ai taavale po o nisi mea faapena, na ona uma mai lava ia ona aumai lava o le ieie solo ese ae faaaoga e le isi taavale, a o masini nei e faaaoga mo le soifua maloloina, e uma e tatau ona sterilize faalelei, e i ai foi le poto faapitoa e aoao ai le aufaigaluega mo le teuina ma le care ina o masini nei, ina ia umi ma lelei ma umi ona faaaoga.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Lau Afioga i le Fofoga Fetalai, e le o nofonofoai foi la le tatou Matagaluega, talu ai ona e le o ia i tatou le tele o tomai faapitoa e manaomia faapitoa nei, o lea sa fai ai taualumaga ma fesootaiga ma e o lo o mafai ona ofo mai fesoasoani mo i tatou. O lo o fai le tatou faiga faapaaga ma le Manukau District Health Board i le aumaia lea o latou tagata faapitoa e galulue i inei ma o atu foi o tatou fomai e ao mai ia tomai faapitoa e auala atu i le tatou Feagaiga lea ma le tatou fesootaiga lea ma latou. E le gata i lea, ua leva ona tauave mai lenei taumafaiga faatasi ma le falemai foi lea o le Specialist Hospital i Aukilani o le Ascot. O le falemai lena e faapitoa lava o fomai faapitoa uma la e galulue ai o lea e avatu nei i ai tatou mai i o. E talu ai ona o le tilotilo la lea e le gata i le faaaaogaina o masini ma le faaaaogaina o le tomai e le o maua ia tatou, aua o le ala foi lea o le ave i o o tatou mai, ua faatupulaia le seleni a le tatou Malo e alu e ave ai tatou mai i o. O lea la ua amata ona tilotilo le tatou Malo i se isi faiga e faaititia ai le tulaga lea ae siitia ai foi ma le auaunaga i o tatou tagata. O lea la ua fai nei le fesootaiga ma i latou ia i le Ascot, ma o Me i le masina nei, ona aveave lea taatia, ona sa faatali se i maea le tatou falemai fou. Sa tilotilo i se isi nofoaga e faatino ai auaunaga faapitoa faapea, peitai ane, ua toe liliu le tofa ma toe fesuiia ia fuafuaga, e sili ai pe a faatali se i uma le tatou falemai, ae faaaoga tatou falemai, o lea la ua amata i le taimi nei. O Me i le tausaga nei, na ou talosaga ai se feiloaiga ma le Alii Pule o le Ascot, ma o lea na maua ai lou avanoa i le malaga na ou alu talu ai nei matou feiloai ai ma talanoaina le faamoemoe lea, na malaga mai inei i le Fua lea na uma atu nei a tatou e asiasia le tatou falemai ma tilotilo la i itu ia, ma o lea la ua ia te au foi le lisi o vaega o le a mafai ona vave ona oo mai ai le latou fesoasoani, o le talosaga la nei e faatotoga le tatou falemai ina ia mafai ona omai latou fomai faapitoa e faia i inei le auaunaga nai lo le ave o tatou mai fafo. O lena faiga, e taugofie mo tatou tagata e le tau totogia ni pasese e o ai, ia e o foi ma aiga, e fai foi o le o i Niu Sila e mafatia foi o tatou aiga i Niu Sila aua e le o atu nonofo lava i le falemai i le taimi atoa, e nonofo i aiga ma tausavali foi i le falemai, ia o le avega faaopoopo foi lena i nai o tatou aiga e alu ai i Niu Sila, peitai, afai e mafai ona omai fomai i inei ma fai i inei togafitiga, ia o le a foia le faafitauli lena ma taugofie mo le tatou Malo, e taugofie mo tatou tagata, ae le gata i lea, o le a maua foi ma avanoa o le a maua ai se faatupulaia o tomai o tatou lava fomai, aua a malaga mai ia fomai faapitoa nei, o le a avea foi ma avanoa o le a galulue faatasi ma tatou fomai, ma maua ai foi so latou tomai faaopoopo ia ma mafai ai i se taimi ona tauave ai lava e latou ia le galuega e aunoa ma le toe manaomia o tatou fomai mai fafo, ona fesootai mai lea o le vaega lena ma le tulaga i aaoaoga lea sa taua e le isi foi sui usufono, pei o le faiga o lo o fai nei i New Guinea, sa fai ma faataitaiga, Papua New Guinea ma Ausetalia.

Lau Afioga i le Fofoga Fetalai, e manaia le manatu na aumaií ..

FOFOGA FETALAI: Malie lava lau Afioga i le Minisita, se i avatu le avanoa i le faauilavea a le sui usufono.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

Afioga Hon TUITAMA TALALELEI TUITAMA: E a pe a malie, se i uma atu lau, mulimuli mai oe, ou te le i oo atu i le mea lea na e taua, ou te oo lava i ai, ae nofo i lalo, se i faauma atu lauí ..

Tofa Lealailepule Rimoni Aiafi: O le a ou nofo i lalo lau Afioga.

Afioga Hon TUITAMA TALALELEI TUITAMA: Fai lou loto.

Tofa Lealailepule Rimoni Aiafi: O le a ou nofo i lalo. Ia e usitai foi i le Afioga i le sui usufono e matua, ae ua ou alofa, e fai sina vasai laitiiti se i malolo ma taumafa sana vai, leaga o lea o le a oo tonu lava i le mea lea sa taua i lau lauga, muamua, i fomai ia i tua, po o ua faaaauau pea leaga o lea sa maua i le taimi faatoa talanoa le Tala o le Tupe ua taumafai e taofi, e tatau pea ona faaaauau lea faiga e fesoasoani ai.

Afioga Hon TUITAMA TALALELEI TUITAMA: Lau Afioga i le Fofoga Fetalai, e pei lava ona ou taumafai atu i le sui usufono, ou te le i oo atu i le mea lena, onosai mai.

Tofa Lealailepule Rimoni Aiafi: O, ia toe tuu mai laí ..

Afioga Hon TUITAMA TALALELEI TUITAMA: Ia lavapapale mai lau Afioga i le sui usufono mo Faleata Sisifo, o le a sui lou itumalo.

Lau Afioga i le Fofoga Fetalai, ona ou mai lea i le mea lea sa taua i mea o aoaoga e siitia ai le tomai ma le tamaoaiga o le silafia o a tatou fomai. E sao lelei le agaga lea, ma o le agaga foi lea na taumafai ai tatou pei ona i ai le tatou fesootaiga ma Manukau. O le taimi nei, o Papua New Guinea, sa avea o se Colony o Ausetalia, o le la e mautu pea lava latou faiga paaga lea la e maua lava foi avanoa o Papua Niu Kini e o ai i Ausetalia ma aooga ai ma faaaoga foi fesoasoani a Ausetalia. O lea foi e fesoasoani mai Ausetalia ia tatou, ae le maua la le tatou fesootaiga lea faapea, pei o le fesootaiga lea e fai ma Papua Niu Kini.

O lea e maua le tatou fesootaiga ma Niu Sila, a o le faalavelave lau Afioga i le Fofoga Fetalai, e le faigofie ona faaofi o tatou fomai i aoaoga ia ma polokalame ia o aoaoga lea e maua ai faailoga e maoae o lea o lo o tausaili i ai ma avea foi ma luitau i fomai latou te fia ausia. Ia o le agaga foi lea o fomai latou e fia maua latou faailoga ia, mea ia o fellowship, membership, ioe, e manaomia foi e latou vaega na, ae o le tulaga lea e i ai, e toatele o tatou fomai lea e o i Niu Sila, lea e tailua tausaga mea o attachments, o atu lea faigaluega i totonu o falemai i Niu Sila, e mafai ona ave e lesitala, galulue e fai galuega, e galulue na o latou, e le tau vaavaaia aua ua faatupulaia o latou tomai i le lua tausaga lea.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

A toe foi mai, e toe foi mai e aunoa ma se faailoga, po o se certificate, po o se diploma, something to show e le se accreditation e mafai ona omai ma latou e fesoasoani ai i le latou status e siitia ai le latou status, ona faapea lea, e lelei lea talu ai ona o lea ua maua mai, ona o le careers factor lea ua i ai nei i Samoa, ua faalagolago i mea o faailoga. Seiloga e i ai sou faailoga ona faatoa siitia lea o oe i luga i le isi level i le isi level. A omai la nai fomai nei, ua maoae le tamaoaiga lea e i ai, omai loa fai galuega i luga atu o le level o la e i ai ae le maua se latou faamanuiaga i ina, e le siitia ai so latou totogi, leaga o lea e fua le totogi i le level o i ai mai totolu o le careers doctor. O le mea lea ua faatutugata ai foi isi a tatou fomai e o i Niu Sila, aua e moni e omai ma faaopoopoina tomai, ua latou ausia foi galuega e sili atu ae tumau lava o latou totogi mai o, e tumau foi le latou level, po o le Registered 1 po o le Registered_2, e le oo i se consultant level. Ae o la ua galulue faa-consultant ona o le tomai o la ua i ai. Peitai, a o tatou fomai i Fiti, e o tailua pe taitolu tausaga, e omai ma le Diploma, omai ma le Master. A aumai loa la le Master, lea ua i totolu o le careers doctor a fomai, tuu sao lava i le mea la e i ai le totogi o le Master, ua recognized. O le esesega la lena o lea ou te talatalanoa atu ai. Ana ogatusa, o le faalavelave e le mafai e Niu Sila ona faaofi o tatou tagata, tusa lava po o le a le maualuga o le tomai, e le mafai ona talia, e enter i totolu o le polokalame lea i aoga po o le fellowship programme se i vagana ua toe o i lalo e toe amata mai pei lava o fomai Niu Sila. Ia o ai la e toe sau mai luga o e ua galulue faa-consultant i fomai i inei, ae o atu toe o ina ia mafai ona enter i totolu i i. E matua le talafeagai lava lea fuafuaga, ma e leai foi se fomai na te fia faia. E sili ai la le o i Fiti, e omai ai ma se accreditation e faailoga ai ma tomai ua latou ausia ma ave foi i ai faamanuiaga talafeagai.

Lau Afioga i le Fofoga Fetalai, o tulaga na o tatou aoaoga, o le quality of services, o le siitia o le maualuga o le auaunaga o le tatouí. O lo o i ai taumafaiga a le Matagaluega i le siitia o le tulaga lea o le quality assurance, o taumafaiga lava ia i so o se fale faigaluega ma so o se Matagaluega foi i lou iloa. E tatau lava ona i ai se vaega e vaavaaia po o lelei ona faatino galuega, pe le o faia faatalapelo, pe le o faia faatogafiti le quality o le latou galuega lea e fai. E tatau lava ona i ai se tulaga faapena. E i ai foi la totolu o le falemai ia, o lo o i ai a latou taumafaiga o lo o fai i le taimi nei ina ia mafai ai ona latou ausia vaega ia. Peitai lau Afioga, e le i mafai ona faatino i le taimi lenei le vaega lea, ua leva ona tatau ona i ai. i totolu lava ia o le auaunaga po o le NHS. O lo o i ai a latou taumafaiga tau amata lea ua ou vaavaai atu i ai na ou tapa, po o le a le latou gaoioiga e address ai le issue lea, o le quality(po o le latou galuega e fai, o le accountability_i a latou mea e fai. O lea la e i ai a latou taumafaiga o lo o faagasolo i le taimi nei, lea e i ai le vaega lea o lo o latou taua o le complaints policy ma le latou consumers code of rights and responsibilities. O latou na taumafaiga. O le faalavelave o le tulaga lea, ua uma ona ou talatalanoa i nisi o le aufaigaluega i le vaega lea. Manatua foi, e te le toe alu lava oe e faamasino oe ma fai ou togi.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

A faapea e te manao e suesue lau galuega, e sau se isi tagata e fai lau suega pe sau se isi tagata e tilotilo i au mea na fai, ona iloa ai lea po o sao au mea na e fai po o lelei pe leai. Ae a e nofo oe ma togi, o le a e sao uma lava au mea ia na fai. O le tulaga faapena, lea na taumafai ai loa le Matagaluega o le Ministry, aua o latou lea e i ai latou te supervise overall, e latou te oversee ma latou vaiaia le quality o galuega o lo o faatino i totonu o le Matagaluega, ua uma ona latou tapenaina i le grievance policy lea foi sa ou ttauau o lea foi na mau i pepa ua silafia foi e nisi, ua uma foi ona pasia e le Kapaneta.

O le taimi nei, ua faagasolo le faatinoga o le grievance policy e i ai pepa e tapena ina ia mafai ona faatumu ma le auala e fai ai, o le fautuaga foi lea i le Matagaluega, a maea ona fai o ia galuega, ia logo ma faailoa i le atunu, a i ai se mea e i ai se isi e fia faasea i le galuega a le falemai, o i e tau i ai, alu loa tau i ai e faatino lau galuega ma le turn around time ia aua ne i silia i le vaiaso ua toe maua e oe se tali. O le accountability lena e tatau foi ona faatino i totonu o le Matagaluega ina ia uma ona fai le complain, galuega e faatino ma tauave, sailili, maua mai le tali o lau complain, toe logo oe o le iuga lea o lau complain ma o lona taunuuga lea ua faapea ma faapea ma faapea.

O le tulaga lea ua ala ai ona tumu lou ofisa. Ua iloa foi nisi o Minisita nei, a omai nisi o latou itumalo, ona sulufai lea i ai aua e le iloa po o fea e o i ai e ave i ai mea nei, a latou faasea i faaletonu latou te faafeagai pe a taunu atu i nofoaga e faatino ai ia auaunaga faa-Soifua Maloloinaí .

FOFOGA FETALAI: Ua ou vaelupeina le saunoaga a lau Afioga i le Minisita, ua ou lagona lava ua matua logo lelei le tuleiga ma le saunoaga, ua faalogologo foi ma le manino le tatou Maota i le matagofie o folasaga manino atoatoa aemaise le auiliiliga o le tali mai a le Matagaluega e ala i finagalo o sui usufono, ae paga lea, ona ua tatou taunu i le tatou taimi malolo. Ona ou manatu lea lau Afioga i le Minisita, o le a faaauau le tali a le Matagaluega ma lau Afioga pe a tatou toe taliu mai le aso o le a tuu atu i ai le tatou Fono.

Ona e talitonu o lea ua taatia i lagotonu le faamoemoe o le polokalame o le tatou Fono ae i ai foi nisi o fuafuaga a le tatou Malo e le mafai ona tolafia, ona o le faamoemoe o le tatou Malo mo le aso a taeao. O lea ua manatu ai, o le a i ai se fuafuaga mo le aso lenei, e faavagavaga ona o nisi o tapenaga a le Kapenta ma le Malo aemaise foi o sui usufono mamalu o le a le faaauauina ai le tatou Fono mo le aoauli nei ae o le a tatou tolopo seia le itula e 9:00 i le taeao o le Aso Faraille. O lea faamoemoe ona o fuafuaga a nisi o Matagaluega a le Malo e fia faimalaga atu i Salafai ona o nisi o faamoemoega taua pei ona silafia e le tatou Maota.

O le aso a taeao o le a tatalaina ai nisi o galuega tetele a le tatou Malo i Salafai. O lona uiga ua manatu e tatau ona tolopo le tatou Fono ae tatou agai e faatino galuega ia ina ia manino ma malamalamala le silasila a Samoa, e le gata o lea tatou te talanoa i le lufilufiina o le tamaoaiga i luga o fuainumera ma pepa.

24 IUNI 2015

Tulafono Tau Faaofi o le Faatatauina o Tupe Faaopoopo (Nu.2)
2014/2015 & Tulafono Tau Faaofi o le Faatatauina o Tupe 2015/2016
– felafolafoaiga i luga o le faitauga faalua

A o lea ua tatou agai e molimauina le tatala aloaia o nisi o fuafuaga sa faataatia atu foi i le tatou Maota ua pasiaina ma tuuina atu i aao o Minisita ma Matagaluega aua le faatinoina.

O le agaga lea ua ou manatu ai, ua tatau ona fai se tatou malologa mo lenei aso, ae tatou sailiili malosi mo le afiafi a nanei, o nisi lava e fia malaga i Salafai i le afiafi nei, fai lena, ae ua ou manatu ua faavagavaga le itula lenei mo tapenaga a le Matagaluega o Galuega, Felauaiga ma Atinae Eseese aemaise foi le Afioga i le Minisita ona tatou toe potopoto ai lea i inei i le taeao o le Aso Faraile e faauma ai le tatou galuega.

E momoli atu le agaga faafetai i le paia ma le mamalu o le tatou Maota Fono i le tauavagameaina o le tatou Fono mai lava i le Aso Lua e tau mai i le aso. E manatu o lea ua toe o se aga ona faauma mai lea o le tali a le tatou Malo e faaiu i le Afioga i le Palemia, ae ou te talitonu ua tele ma anoanoai le tatou galuega ua uma ona faatino. Ona ou manatu lea, o le a tatou faia se malologa se i vasai foe ma tatou tolopo ai seia aulia le aso ua faatulagaina atu.

A o le i faaumaina le tatou Fonotaga i lenei aso, ou te tatalo atu i le Susuga i le sui usufono mo Faleata Sisifo, lau Susuga i le Tiakono o le Ekalesia e te tulai mai e faaiu le tatou Fonotaga i lenei aso i se tatalo faamanuia, ona tatou malolo ai lea.

Na motusia Felafolafoaiga ina ua tolopo Taualumaga a le Fono Aoao i le itula e 1:01 i le aoauli seia aulia le Aso Faraile, 26 Iuni 2015 i le itula e 9:00 i le taeao.